

聽  
雨  
樓  
隨  
筆

道光癸卯冬余奉

命視學蜀中下車觀風以各郡竹枝詞命題  
將以訪土俗稽故實也越明年按試嘉定  
時榮縣令山左王君雪嶠代辦提調事擬  
嘉州竹枝詞十二章為諸生倡騷情古意  
有當於古之作者叩以地方公事文風士  
習一一能舉其要心竊異之知其為循吏

也既出其所著聽雨軒隨筆六卷問序於  
余大率仿錦里耆舊傳而以揚扆風雅為  
主凡蜀人士及遊宦於蜀者嘉言懿行志  
乘所缺無不摭拾而存之以至異物殊俗  
軼事雋詞悉識焉富矣哉蜀雅一書不得  
專美於前矣夫作吏一行便廢此事中散  
笑之君鳴琴卧理民淳事簡以其餘閒從

事著述旁搜博採成此一編儻所稱升高  
能賦山川能說者歟余征軺所在每思採  
輯各府廳州縣志參以聞見訂為蜀輶隨  
筆試事倥傯未及成帙為憾讀此編益歎  
君之以槃槃才數優優政者為不可及也  
君復輯鄉園憶舊錄以容齋之洽聞繼新  
城之盛軌山左先大父暨先君子所宦遊

也父老所傳猶有舊政焉是書也成余尤  
先睹為快矣昔

道光二十有六年歲次丙午秋八月愚弟

蔡振武拜撰



於兩橋得筆序

寫崎於年為同輩友也宋王  
年宋兄之宋之學子不及寫  
崎遠古寫崎弱一討以久藝  
名習時試屬讀年三十九始  
與年同乙未亦以試去其友不

茅陽令韓力於學上必見諸  
子百家而力披言金龜諸  
百之者考執之思有不美  
術為善也計免之如馬中  
又曰馬人士及遊之於馬者  
之造造之其風土之氣在氣

而書之於法りて達於面楮  
之極指當予之於將來也  
也乎人生哉。おるは之故  
日研硃玉三寢食猶不  
如忠告聽然此終日望望  
一語萬人如不戰及之何之



別欣、止息、足於肩、曉、言、  
 二、高、り、二、健、或、飲、酒、微、歌、  
 以、鳴、其、得、言、る、年、年、何、處、  
 三、止、お、酒、其、空、日、暮、學、硯、  
 之、其、眠、久、其、去、王、地、之、大、  
 更、龍、子、亦、之、又、其、時、或、曉、為、

後及之向後用之古今合之  
名不暇及初或將待其人而  
付之初守嶠偁即其人初  
不初抑河其睡也年與諸嘉之  
二年守嶠出守辛治友即嘉  
而民淳而守者因得取而而據

指在編輯付梓初以雨梅  
隨筆問序於年時朱子意在  
水心亭基處夜坐於綠角  
滴瀝一落芭蕉葉上他丁  
東聲亦治城之雨之耳心園  
同不同未可知也及讀其

為書淒淒淒亮泣入又  
如一片雨聲從屋上吹來  
不若雨之聲為草不化  
不若雨之聲為人等為雨  
而化之久且止其為雨  
與草未上將之之似化  
其遂起接

學而序之

心法思和節勸坎之持序

聽雨樓隨筆自序

國初費氏父子輯明蜀詩及劔閣芳華李  
雨村因之有蜀雅續蜀雅則斷自本朝所  
採皆蜀人而遊宦於蜀者咸缺焉夫時異  
勢殊文人踵起即風俗物產亦日新月異  
譬泛滄海明珠文貝不勝采也如入寶山  
琅玕美玉求則得也苟捧檄來川需次多

暇每於市間得斷簡殘編或燕會晤談偶  
聞佳章及軼事錄而藏之叢雜錯亂毫無  
統緒漫置故紙堆中不復省記甲辰夏學  
使蔡麟洲先生按試嘉定公餘謁見下詢  
風土乃知觀風時試各府竹枝詞蓋有為  
也因思遊蜀數年茫無所知倘有問焉慮  
無詞以對爰就素所聞見命鈔胥謄清又

素性善忘乃刻諸木以備觀覽非敢質諸  
大雅也昔吾鄉漁洋先生有蜀道驛程記  
江督陶雲汀先生有蜀輶日記此皆皇華  
星使膺採風問俗之責其人胸羅武庫筆  
湧文瀾均足沾溉藝林豈孤陋下士所敢  
希其萬一雖然富商豪貴入五都之市舟  
車捆載而歸而羈旅貧窶之子偶得一二



玩好未嘗不以誇示里人也特是錯雜無  
章無以名之因錄於聽雨樓中即命之曰  
聽雨樓隨筆夫隨所見而錄其所不見者  
多矣隨所聞而錄其所不聞者亦多矣倘  
惠而好我補其不足訂其紕繆他日朋好  
及鄉里父老可以此塞其問則此遊為不  
虛也道光乙巳夏濟南王培荀書

凡例

一唐宋元明諸大家無論生于蜀遊于蜀者均可不錄  
卽本朝如蜀之費滋蘅張船山宦遊如吾東漁洋荔  
裳諸先生詩人所共見多不勝錄略摘一二未免掛  
漏故概從割愛或因他端連及則附見焉

一李雨村詩話載近今蜀人詩爲多官斯地者亦雜見  
焉原不必再錄然或因事及之各有所取非相襲也  
要亦僅有至吾東其中有詩可徵者則不嫌採取  
一是編非詩話之比故直錄其詩高下隨人意會不敢  
妄叅末議偶有贊歎興之所至亦不自覺如是者亦

鮮耳

一鄙意在存風土故于異物殊俗多有採訪嫌其枯寂  
隨手作韻語以紀非敢言詩也凡不著作者姓名皆是

一新奇可喜之事雖涉幻杳亦錄以資談助其中難免  
以訛傳訛不復能辨

一苟本無學問復寡見聞辦公拮据無暇復事翰墨自  
去秋始欲纂輯而案頭並少冊籍可資考證孤處一  
隅無士大夫往還不過搜什一于千百知見笑大方  
然百衲之衣非自出機軸暇時披覽聊以怡情

張海雲軒鵬

王遲士

侃

廖扶九朝翼

校訂

周梅生仁恬

聽雨樓隨筆卷一

本朝四川巡撫自吾鄉王公太平

跡跡不羈著有願學齋集題項王本紀云英雄竟以成敗  
論嗟哉帝王豈有真亞夫不用乃考終淮陰逃死未央宮  
是知仁與不仁異楚亡漢王亦細事垓下何必更悲歌虞  
兮呂兮較若何議論警闕氣概雄偉贈劉節之詩云驢脊  
如柴少羈勒小挫風期非我曹又云金盆濯足錦爲廝以  
此相酬亦堪恚是馬周張鎬一輩人在川兵火之後極力

撫綏卒於閬州

是時巡撫  
駐節於閬

宋玉叔琬號荔裳山東萊陽人順治丁亥進士著有安雅堂集詩與施愚山齊名爲蜀臬旋入京卒王阮亭云蜀亂久不得荔裳妻孥消息良友惓惓之意如此查他山爲阮亭及門詩集有中山尼一篇情詞悱惻似有所指錄之備考中山女顏似玉布韞青鞋行彳亍白日潛形灌莽中逢人不敢吞聲哭自言生長本名家阿父才名宋玉誇千里飄飄隨遠宦一家迢遞入三巴養成嬌女嬌無偶掌上明珠唾隨口花前侍妾盡知書鏡裏新妝時學母自從觀察去朝天宦署清涼隨可憐寇盜西南俄阻隔羣氛狼豕掃東川孤兒寡婦皆臣僕翠袖牽蘿行補屋賣散平頭計漸

貧嫁分紅粉身何獨飄零無賴到南遷夫婿移家遠入滇  
幾夜新婚成永訣旋收戰骨葬江邊早年淪落多關命石  
上三生眼前證便遣情緣着死灰行依新月開圓鏡小鬟  
何意尙隨身宛轉青絲手共分金剪無聲雲委地寶釵有  
夢燕依人扶攜同向山中寺改口人前喚師弟別與繙經  
起法名慶光就是閨中婢皓齒明眸兩比邱久拚生死等  
浮漚香燈繡佛前因在從此相依擬白頭晨鐘暮鼓流光  
易荏苒今年三十二骨肉深恩且勿論滄桑時局關何事  
何當六詔又屯師十月孤城乍解圍將軍奏凱功無敵悍  
卒摻牢勢不支移巢拔穴驅人起但是有身無避理一朝

蓄髮強同行幾度剗刀猶不死歸程昨夜次偏橋哀角吹  
殘令寂寥却喜道旁俄見棄草閒趺坐度清宵同行偶傍  
江東客指點雲山曉來跡雙江暫擬尋同伴半路又驚逢  
邏卒太守呼來淚未乾含啼一一語悲酸亂來莫說爲官  
好兒女姻親那得完夢裏生還愁故里依稀記得萊陽是  
已作昆明劫後人托根何必仍桑梓君不見列帳西來珠  
翠圍念念粉鏡去如飛不知皂帽天涯住何似紅裙馬上  
歸按荔裳以康熙十二年任是年十一月吳三桂反十三  
年蜀巡撫提鎮俱從逆全蜀皆陷宋之妻孥漂泊當在此  
時公蒞蜀未久政聲卓然有蜀遊草其子後挾以入京漁



洋選入感舊集四川通志亦多載之公少時有族匪宿土地祠夢神使告公與山賊于七通遂入獄公乃得白施愚山弔之云西川終古流殘淚東國從今少大風張白華山人詩云妻孥遠寄蠶叢外楚些誰招宋玉魂

王阮亭先生士禎康熙壬子典試四川路過聞喜縣拜大司馬霽宇公祠公名象乾崇禎閒爲四川巡撫與阮亭之祖二如亭主人方伯公象晉同學太翁庭訓極嚴元旦拜家祠畢卽命入學每日課七藝仍讀經史古文一藝不佳責有定數阮亭與西樵共讀稍爲寬假阮亭成進士爲揚州推官河道總督朱之錫薦於朝擢禮部主事

朱歿爲河神封助順

永寧侯奉使有蜀道集識者謂具二十分力量或議其僞杜  
欺人考先生歸未抵里而遭大故其詩之險峭排奭得江  
山之助而無端感慨愴惻有動於不自知者非有意摩少  
陵之壘也 聖祖諭廷臣曰山東人多偏執好勝惟王士  
禎則否其作詩甚佳 高宗諭閣臣曰原任刑部尙書王  
士禎積學工詩在本朝諸人中流派較正然則下士之論  
固不足憑矣自記此行所歷名山如太行霍山姑射中條  
太華終南太白岷山青城諸勝惟太華與錢肱差相伯仲  
於路得三望峩肱可謂歸去得雄誇矣

鄭次公曰奎康熙壬子與王阮亭先生同典蜀試登澄清

樓云扁舟來過古巴國獨上危樓一縱探城郭大都依壁  
岸人家一半住烟嵐招賢館廢荆榛長來鳳山荒鳥雀參  
惟有滔滔渝閬水流將旅恨下東南樓在巴縣朝天門蓋  
歸路經重慶作也漁洋云七律如挽強弓十分滿者古今  
不多觀次公七律固未必與漁洋抗行而懷華陽道人用  
貽上韻未甘退處邾滕五古亦奮然欲樹旗鼓訪華陽山  
人於伏虎寺志別云山遊得我眉於山意已足所恨在絕  
域迢遞阻川陸乘遊良不易久已謝塵俗誰謂天無私乃  
爲仙隱獨卓哉華陽彥山水嗜何酷負疴歷荒遠探奇忘  
遠躅一杖幾兩屐藥裹兼書簾輕舉而冥搜日與煙嵐觸

幽異不敢匿午夜山鬼哭入山與山忘締緣知己夙翳余  
執掌客風塵走碌碌不謂萬里行此地快瞻矚瀟瀟遠公  
房爽氣淨如沐竹露滴清響松風薦寒馥晝坐頻淪茗夜  
談還秉燭翛然人世外兩心暗相屬自憐事名場苦未謝  
羈束宦情本疎澹世故柰牽促惘然難久畱分袂慚已速  
緬此蓬蒿徑何殊杜陵曲從遊愧二仲悵別愁千斛峯頭  
後夜月魂夢空相逐別我眉云昔聞蜀中山奇勝首我眉  
背岷面錦江橫絕西南陲萬仞裂冰雪排空拂雲霓迢迢  
十八盤紅泉遶丹梯仰捫井參近俯瞰嵩華低峯藁鬱岩  
嵒洞壑仍逶迤其陰蓄雷雨其陽靄煙霏精英產靈異光

怪何陸離羣態窮冥中明滅誰端倪頗疑大澤枯蛟龍互  
躩踞蒼然秀天末不受風塵縉允宜仙與佛滅景成遐棲  
竭來事行役訪舊偶此窺光響亂眺聽雲氣沾袞衣到來  
甫十里幽情悵襟期何況陟其巔八表供支頤簡書旣苦  
迫領略遂多遺草草來與去永爲山靈嗤自不早投簪名  
山願孰違

御史郝公雪海名浴直隸定州人順治乙丑進士巡按蜀  
中吳三桂驕橫不法兵爲賊敗奔綿州賊前鋒將抵保寧  
公監省試於此一晝夜七馳檄邀三桂赴救責以大義謂  
不死於賊必死於法又上封事力言三桂縱兵焚殺陰蓄

異志吳逆銜之使私人董顯忠揭之於朝并誣以守城冒  
功流徙盛京吾淄高念東侍郎珩與交善送以詩云投鼠  
誠知罪寒蟬愧不鳴師燾蜀地蹙疏入漢臣驚議貴輕編  
管全生賴聖明盈庭方切齒豈易舊京行萬死身猶在投  
荒幸少年談兵元爾素報國更誰先一節監諸校孤軍定  
兩川書生堪授鉞淮蔡有前賢後三桂反如所言朝士皆  
爲訟冤奉天府尹魏環極尙書王敬哉兩先生再疏保薦  
召還仍任本道御史念東又贈以詩云西清重到侍垂衣  
萬死人從淚水歸正可極言天下事莫言主聖諫書稀當  
三桂隆盛時雪海敢捋虎鬚念東先生贈詩切中情事言

微而顯居然史筆七絕尤得良友規勸之義雪海終廣西  
巡撫

蔣虎臣超金壇人母夢我眉老僧而生自直隸學政告歸  
入川居伏虎寺王漁洋懷之有望裏我眉秋月斜句虎臣  
自號華陽道人吳天章見其壁上和女郎詩題其後云聞  
道華陽句曲仙布衣粗糲學枯禪如來也有閑情賦寫到  
青樓燕子邊看盡名山杖古藤蒲團夜坐冷如冰只今綺  
語畱金粉尙爾天花着定僧此所謂不風流處却風流也  
臨終作偈有云惟有君親難報答觀此知人間無不忠孝  
高僧又傳明嘉定伯楊展爲我眉無窮和尚轉世一日入

山禮大士畢作偈云四十九年別普賢今朝又到白雲巔  
非我有心辭佛去只緣身世湮盤閒

幾菴王公隲山東福山人順治乙未進士官終戶部尙書  
爲四川松茂道極陳採木之苦請停減下九卿議未允

聖祖謂塞外松木材大者甚多何必楠木川省採運得停  
止時蜀中軍務方急公穿賊壘運糧備極勞瘁有聞警詩  
云志仁擇死地臨難忘沉吟皮骨終成土觸懷奚足珍

君恩深似海父命重如金一朝苟過差百歲無追尋丈夫  
眼看劒妾婦淚沾襟碧化忠臣血虹吐壯士心伏波思馬  
革怪是製衣衾太翁值歲饑曾以海船往遼東運米平糶



活人甚多後夢一馬入庭缺一耳公生遂名之曰隲亦暗合陰隲之義矣迄今福山王氏魁元接武科第與新城王氏相埒卽請停採木一事敢言之氣愛民之心亦具見矣

公實爲威茂道通志作松茂道從後來所改耳

漁洋記歷城王雲芝先生敕督學四川異蹟甚多在眉州掘地得古硯有雙鴛鴦于山得東坡硯按臨雅州謁紫府飛霞洞其夜祠鐘自鳴可知其有夙根也遊洪雅禪寺有感云乘閒來訪梵王家古木陰森暗落花野鶴乍驚門外客老僧常臥隴頭霞尋山但策邛嶺竹汲水頻煎蒙頂茶却笑禪家貪課蜜眼前不用關蜂衙里居時常見其裔孫

藏公行樂一卷自幼讀書及爲官隨時衣冠各異兵部張  
鶴鳴登萊巡撫宋應昌各爲之傳記亦小照中獨開生面  
也

蘊璘張公含輝山東掖縣人任四川學政著有蜀草雲樓  
送客云行沾曉露向雲樓漸望朝霞日影流野斷蛩音方

寂寂烟迷客思正悠悠送君暫借杯中物念我期銷馬上

愁滿座西風吟別意誰知分袂在新秋

公順治壬辰進士

念菴王公沛壇山東諸城人康熙甲子舉人五十三年任  
建昌道官終吏部侍郎加左都御史家居率紳士賑饑兩  
次蓮臺雨霽詩云偶尋樵徑上陟彼翠微閒嶺溼雲徐度

秋深鳥愛還殘虹天外錦落日畫中山記與隣僧約柴門  
尙未關公工制藝高古醇實先正風規詩其餘事也

綏遠將軍蔡公毓榮平吳逆有功初三桂在陝西結綵樓  
二十里以鼓樂親迎圓圓及鎖雲南又得四面觀音入面  
觀音皆國色于是圓圓退處入面觀音尤艷絕將軍平吳  
得之生女名琬嫁高文良公其倬才德兼擅著蘊真軒詩  
過九峯寺有感云赤手屠鯨千載事白頭歸佛一生心蓋  
悲其父手平逆藩後歸空門也公於康熙九年任四川總  
督過眉州嘗三謁蘇祠葺而新之雅意文學不徒以武功  
顯也

四面觀音爲將軍占穆所得

趙襄毅公良棟征吳逆平西番屢建大功後來惟岳威信  
公功名與相埒先後爲四川總督生平仆而復起卒保始  
終爲我朝名臣出處亦略相類里居時嘗燈下與友人  
閱其奏稿鈔本數卷西域軍中奏議爲多友題詩有句云  
豈爲封侯走戰車予謂稱後世武功似不宜用戰車字走  
筆和之云英名久與斗山齊夜半軍書手自題銷骨鑠金  
丹闕外量沙聚米玉關西千秋趙牧圖麟閣萬里天山入  
馬蹄後起岳家軍莫撼當時奏稿竟誰攜威信公有蟲吟  
薑園復榮諸詩集而奏稿未傳故及之

鄭吉士浙江仁和舉人由衢州府教授康熙閒陞安岳令

年已七十二矣而精力如少壯凋殘之餘極力撫綏善政  
甚多登慈雲寺詩云巉巖幽磴幾千重絕頂精藍甫竣工  
猿鳥每同清梵響鐘魚時出亂雲封馬前樹密山光暗林  
外天低雪意濃老衲殷勤供茗盃風塵暫此托閒蹤返轡  
晴光萬里來復經蕭寺陟崔嵬莓苔古徑逢巉石林麓斜  
陽見早梅徐度板橋阡陌濶遠投烟塢市廛開勞勞車馬  
空來往民患無由自主裁

時兼權樂至因公  
事同官未能相協

周于仁安岳人號仙山生而穎異十二歲入泮旋食餼舉  
孝廉雍正閒爲福建永春令將到縣夢人授以聯云只應  
憐新婦不須念故交到任閱案牘有吳一妹者爲前令鄭

所拘事本屈抑而鄭則同年也恍然有悟審實釋之一邑  
稱神自是每伸一冤民爲豎一旗杆調往他邑旗杆將盈  
百矣撤所樹杆建迎暉門外溪橋號曰平政橋遷臺灣別  
駕致仕歸來時不攜家累歸時囊無餘貲載書數千卷而  
已

莊大椿江南武進人以副榜知雙流縣居官清介好士工  
詩交歸里後與鄉人爲南華九老會洪太史稚存序其唱  
和詩在任有小篋簞谷詩序云雍正甲寅春復演上人作  
籬溪上予喜其地多古槐修竹勸令闢地數弓爲避暑小  
築應勝韓持國涼堂九丈因作長句付之他日清簞疎簾

或念及老夫耳偶看斫竹插新籬因說乘涼此最宜繞足  
泉聲琴筑響蓋頭槐蔭翠帷低心閒默數行人過坐久時  
聞倦鳥啼他日若逢佳士至小簣簷谷定畱題觀此一端  
可知其風流矣

盧雅雨先生名見曾字抱孫由庶常改官知洪雅縣事蒞  
任八月除不便於民者數事著有雅江新政人多傳誦加  
意士林建書院與諸生講論不倦尤切於地方者莫如詳  
禁開礦一事略云瓦屋山外環雅州榮經峨眉夾江諸州  
縣內通各洞生蠻山則確乎有礦礦則斷不可開洪屬瓦  
屋山梯九溪等處田地不足養贍聚數千百開礦之人坐

食其中米價日增且絕糧矣害一米價增則生計日窘逃亡日多一開礦而遂至失業害二洪邑地瘠民貧一切斫柴汲水負米豢豕皆婦女往來山谷一旦聚數千無籍之徒於人迹罕到之處城市旣遠法令難施姦淫盜竊弱者受其魚肉強者或觸兇鋒不但盜案盈牘而且人命如草菅肆毒於民而卽貽累於官大害三也查明季碑文稱地產銅鉛奸民糾黨開礦擾害鄉民輕惹蠻患害已見於前車矣高山峻嶺奔騰超躍華民之所難山蠻之所易大利所在鼓勇而來邊釁一開不但種禍於末吏而且貽慮於各憲大害四也凡此四者有一於此縱使金銀爲山猶不



忍爲况白鉛乎大憲善其議遂止後歷陞兩淮運使傾心  
好士周其困阨揚其聲譽才士翕然歸之作紅橋修禊詩  
和者千餘人尤畱心桑梓文獻刻山左詩鈔紀曉嵐宋蒙  
泉諸公分任而先生總其成刻漁洋感舊集屬吾邑張榆  
村先生爲小傳共刻雅雨堂二十四種在洪雅時立望春  
雅雨諸勝遂以雅雨自號二子受業於榆村先生皆上達  
孫卽協辦大學士蔭溥也

川東觀察墨麟馬公維翰浙江海鹽人康熙辛丑進士與  
山左盧運使抱孫相善孫子未先生見其聯句詩大奇之  
爲延譽有南馬北盧之目贈以詩云盧仝馬異總能詩韓

孟雲龍意可知交比芝蘭投臭味韻將絲竹迭參差古人  
不作夫何恨此日齊名更勿疑老夫自憐才力盡所欣二  
妙正同時馬公風骨峭厲不屈權貴雍正閒以御史來川  
丈量川南田畝不爲苛刻八年任建昌道以廉正稱詩學  
少陵李雨村謂其來蜀詩已臻險峭著有罍麟詩十二卷  
過大相嶺詩云盤盤出鳥道杳杳行人村斗起邛崃山仄  
隘逾劒門天險遡開鑿未可常理論陰陽分向背旦夕殊  
寒暄連山走雲氣倏忽同追奔一峯獨秀出頗似嶽勢尊  
其下九折坂剗絕割厚坤况復急雨薄萬壑當晝昏回輿  
與叱馭北轍視南轅所志各有託忠孝惟其根踟躕兩不

決心緒蠶絲繁峭壁落井底一髮青天痕人生鮮百歲只  
有名常存勒銘匪易事或用酬驚魂

孫如芝湖廣黃州舉人康熙七年任筠連縣令吳逆逼授  
僞職遂掛冠解組僑寓江安西林寺善詩文工書法高風  
亮節隱躍筆端題邑人叅將雷時祥漁家樂圖四律云誰  
剪吳淞衣帶長漁舟箇箇傍漁梁縱橫片葉全無累自在  
輕鷗渾不妨欸乃聲殘烟雨夕雕胡秋熟水雲鄉秦時明  
月桃溪曲莫識花開在漢唐一簇漁舟水上僊五湖簑笠  
自年年投綸坐嘯磻溪月舉案閒呼范蠡船取醉烹鮮如  
切玉攜魚沽酒不論錢與君共協滄洲趣雞犬雲中別有

天絹軸驚溪任轉舒探來墨妙問樵漁滄洲有曲歌難盡  
飛躍無心景自如國士謾教從狡兔高人只合憶鱸魚江  
頭野寺沉吟久應倩鱗鴻爲報書扁舟汎汎弄晴湖漁蘧  
悠悠酒一壺世上惟君稱樂事箇中添我卽良圖牽風荇  
藻鷗相狎得月蘆花鳥共呼滿目雲山天地廓酩然醉臥  
到黃虞

康熙中儒童高以仁天性孝友其父以誤殺獲罪以仁爭  
於吏以身代之厯筆楚三年卒無難色秋讞日憲鞠曰得  
無悔乎以仁曰求仁得仁又何怨憲具以聞蒙釋免邑  
貢生楊晉誌以二律云三見圍屏草色新依然無恙綵衣

身勇探虎穴誰能爾孝感 龍顏獨此人行路聞風爭識  
面仇家服義亦忘嗔從茲姓字標青史長與鄉閭激後塵  
借問當年就獄初孔襄爭死意何如祇言潤獲飴同美敢  
望吞舟網更疎彩鳳終騰雲裏翮神龍豈作釜中魚生還  
不是徼天幸大孝從來壽有餘

岳大將軍容齋鍾琪上馬殺賊下馬賦詩以橫槊磨盾之  
氣兼輕裘緩帶之風明之郭定武威南塘不足多也高夫  
人亦嫺弓馬精翰墨互相唱酬夫人雨中看芙蓉云芙蓉  
花面艷粧新細雨微風洗庾塵有淚却無湘女恨無言寧  
有息嬌嗔遙思洛水凌波襪想像華清出浴人相對莫愁

秋寂寞一生顏色不傷春將軍軍中夜雨答高夫人見憶  
之什云雨淋鈴帳覺衣單天外西風雁陣寒蝴蝶繡衣空  
有夢芙蓉錦水好誰看三川戍客思開府萬里新疆詔築  
壇重疊濤箋相慰藉戎臣報主倍加餐妾巫雲韓氏亦能  
詩咏梅云薄日蒼涼露遠村南枝消息綻新痕更添逸韻  
神情淡獨倚寒欄夜色昏小院月明標瘦格畫簾風急亂  
冰魂隴頭春色難持贈惆悵無言好閉門英雄兒女至今  
艷稱今日錦城甲第久迷所主裔孫方厓名維良者住中  
江美秀而文兄以進士爲山西令卒於官囊無一錢方厓  
遊幕以筆墨糊口近以佐雜分發山東矣將軍遺籍臨歿

時遁甲諸書盡付丙丁蓋恐後人不善用之反貽累也老  
成遠見尤不可及

王言遠庭嘉興人順治己丑進士任四川北道先生以  
制藝名天下詩亦幽淡閒遠自成一家棧道中云人行山  
上高天在山中小圓暉易沉夜初陽遲報曉馬走山樹巔  
飛鳥出其下雲連深洞迷石缺危橋架七盤非險途三秋  
足清景日夕畱泉聲誰能辨喧靜晚年優游林下以筆墨  
自娛嘗云人皆稱我今古文及詩字不知吾於寫蘭彈琴  
獨得妙理也

丹稜三彭名噪一時尤以樂齋端淑爲白眉年過四十始

作詩落筆老橫所積厚也著有白鶴堂集詩話多採集前人其自標得意句咏蟬云吟老梧桐葉氣先天地秋卽景云颺風鞭野馬飛鳥亂浮雲晚景云遙山吞落日流水盪殘霞七言杜鵑行云深山夜月一聲啼天地有春畱不得題馬力本玉井蓮云天生神物花十丈污泥不到太華顛皆奇警弟磬泉遵泗卽作蜀碧者七歲濯手水邊吟曰素手濯長渠揚波混太虛還將指上漉驚散水中魚十二歲咏扇上美人橋邊吹簫云仙音不肯隨風響恐引劉郎渡石橋聰敏蓋天生也和人秋字韻云露色遙凝天地氣月明中畫古今秋過劒門云劒拔寒稜障巴蜀氣昏陰雨失



乾坤仲尹肇洙咏菊云野橋晚雨楓初落流水空山日易  
斜秋日晚景云綠盡荷塘烟晚渡白浮葦岼鷺孤飛和雅  
蘊藉不似磬泉之努力作氣矣樂齋雍正癸丑進士所與  
遊如蔡芳三胡稚威皆知名士官肇羅道仲尹與樂齋孿  
生又同榜進士人以爲奇著有撫松亭集官河南道監察  
御史磬泉乾隆丁巳進士官江防同知更有端徵亦樂齋  
弟字子徹乾隆間以孝廉宰山東棲霞當捕蝗時攜訟牒  
至村墟坐樹下爲剖判蝗滅而訟亦稀吾鄉循吏也附記  
於此

吾淄孫先生若羣蚤歲成進士康熙癸丑爲交城令多異

政鈕玉樵續觚賸云遷蜀忠州牧卒於官查四川通志無其名曾閱縣志未爲之立傳鈕云先生學贍品端言動有則鄉里咸稱爲小聖人謁選時館任少司寇克溥家訓其子彥方處以廣廈坐不易床供以豐餽食不兼豆雖隆冬盛暑衣冠襜如司寇知孫有二子已就童試適是時山左學使者與司寇有舊將爲之地而未詳二子名屢欲請之憚其嚴正終不敢發先生端居緘默遇有問難輒指畫談議衮衮滔滔竟晷不倦凡及門與輦下諸子以制藝就正者一一評騭務愜其隱而運之苑枯年之修短皆能於文預決之康熙癸丑出爲交城令攜家以行旣而遣其長子

歸淄就婚課以書藝忽驚嘆曰嗟乎吾子其不返乎泣然而別歸未匝月忽無故自縊死過其故里詢孫姓名或不盡識詢小聖人無不識也今並無知之者曾否爲蜀州牧俟回里時考之

于清端公成龍字北溟山西永寧人官終兵部尙書兩江總督豐功偉烈彪炳國史瑣事遺迹徧於口碑巷里婦孺無不知有公者曾爲四川合州牧騎羸馬屏騶從府中索魚不與且條陳興革事宜招集流亡開墾田畝此公居官之常不久陞去最著在廣西羅城時羅城無城郭公廨在叢篁深箐閒插籬棘爲門牖猿虎白晝行庭中壘土爲几

案傍置竈不取火耗民畱數錢爲沽濁酒僕皆病卒樹二  
槍以自衛平寇盜墾土設學民以大安公子來省有鹹鴨  
割其半予之爲路菜人謂之半鴨知縣其陞合州也一瞽  
者獨隨不去問故曰官無資不能行吾技可供食竟賴以  
濟公之美不勝錄錄其小者見一斑耳

彭山令張梧岡與新津令徐守齋乘筏視通濟堰後梧岡  
以詩寄徐云穿林遠徑影霏微竹裏人家筍蕨肥更愛水  
蒨花夾岸蜻蜓幾箇往來飛官府攜得菜根香小憩桑陰  
午飯涼莫訝主人風味冷恐勞田父餽壺漿源頭活水勢  
頻添繡碧春畦土脈粘又見武陽風景好龍鱗開出萬山

尖徐和云夾岸新秧映翠微跳波發發鯉魚肥浪花無數  
濺衣溼粉蝶隨風逐水飛綠油一瀉勢潺湲潤滴農田頃  
刻閒攜得壺漿停麥隴豈因覽勝對江山漱石穿雲荇藻  
寒篙師最怯路紆盤呼騎踏向斜陽外迴首雲峯興未殘  
張名鳳翥上虞人徐名蕘永康人

梅詩古今題咏最多或分咏山梅江梅盆梅等詩亦多至  
從初開至落後細細分咏者未有也上虞張梧岡鳳翥宰  
彭山與署中賓友分咏含素軒梅花六首題雖瑣碎而詩  
俱清雅可喜含蕊仁和布衣徐蘭欲探羅浮消息難一番風雪孕  
來寒隴頭暗暗迎春轉嶺上羅羅守歲殘笑口豈因芳恨

鎖清姿卻似露珠溥寄聲東閣勤遮護蘊得冰心子細看

乍放

張鳳翥

幾度衝寒出故宮清姿瘦質影朦朧微窺嶺上

半輪月忽聽樓頭一笛風破玉自憐春意透含嬌人愛曉

光融元禽翠雀尋常在略借馨香便不同盛開

山陰茂才金錫類

放遍南枝又北枝清寒透體不勝姿濃香已逗春千里冷

艷難描冰一池鶴唳偏來雪滿處笛聲遙弄月明時箇中

消息憑誰領祇有孤山夢裏知半謝

羅江令崑山進士葉瑩

東君催

卸縞衣裳已謝還畱總斷腸雪點飄零粧半面玉枝瘦損

帶餘香分身化鶴乘風暖殘影窺窗淡月光弄笛聲聲吹

未歇仙姿終返白雲鄉亂落

眉州尉山陰監生張城

颼風颼雨更颼

煙斷送香魂入九天  
慘淡雲飛空裏色  
繽紛蝶化夢中仙  
輕輕薄薄橫槎外  
疊疊重重耐酒邊  
底事羅浮芳信杳  
又勞孤怨逐經年  
剩瓣宋仁和監生已逐東風猶戀枝  
月痕隱隱雨絲絲  
浮煙不盡輕寒夜  
餘恨應羞索笑時  
無計返魂香欲斷  
有情憐瘦意還癡  
傳神縱得徐熙筆  
小影依稀恐莫追

趙作哲字損之號璞菴上海人  
乾隆壬午獻詩賦 欽賜  
舉人授內閣中書遷戶部河南司主事  
殤木果木之難贈  
光祿寺少卿著有姬隅集  
緬甸從軍時作也於山川險峻  
道途艱苦蠻烟瘴雨兵戈倥傯敘述甚詳而筆力矯健長

句尤具馳驟縱橫之氣與王蘭泉先生以詩相切劘故成就卓越如此按其行程足資掌故公自緬平從大將軍溫福征小金川旋自永昌馳二十晝夜抵成都明年殉難冒雨行老秧田道中啼猿滿山率爾成咏云一峯十萬樹一樹四五猿一猿千百聲雜以風雨喧一日十二時一程三十里一軍六千人盡在猿聲裏爾猿有何悲子啼續母啼爾本斷腸物不關生別離三朝復三暮一啼更一躍好似征夫苦翻唱從軍樂在四川宿汶川有七古一篇乞犍爲令王鳳儀畫一百二十韻篇長不具錄在軍中寄陝西撫軍畢秋帆詩云蘭鳩萬里記從軍插羽書中尺素分豈料



餘生重轉徙更從此地一知聞  
尊羹尙動歸吳興棠蔕初傳  
主陝勲今夕戟門人未寢也  
應吟斷隴頭雲無復高樓  
聽雨聲空將身世感鷄鳴  
賜環人老嗟如夢結佩情深  
念昔盟後死我猶思著述得  
時公不愧科名曾同簪筆承  
明側雪壓瓊廬劒獨橫餘詩  
無傳蓋散于青燐白骨閒矣  
子秉淵亦能詩重慶知府

王如玉字嵐溪靈石人貢生官貴州貴西道從征金川分  
理糧務遇變手劒殺數人被重創死贈太僕寺卿著有嵐  
溪詩鈔錄其一首採蓮圖云春池初漲蓮如錢五月翠蓋  
鋪田田紅雲平凝照明鏡不事雕飾眞天然風微冉冉暗

香送露浥的的清珠圓賞心樂事於此遇好攜萊婦酣花  
天一螺試點烏玉玦半幅細寫霞光箋花之君子洵足愛  
得不度曲歌採蓮閒房列屋多嬋娟各攘皓腕移輕船香  
飄羅袂空中舉風折纖腰鬢鬢蟬蓮子有心心有蕙蓮花  
如面面如仙穿花度葉意態別呈技獻巧工取憐佳人雪  
藕絲綿綿千縷萬縷情相牽一雙菡萏連枝蒂兩個鴛鴦  
交頸眠我來坐花花爭妍琴瑟在御靜永年紅衣瑟瑟若  
解語貌取花貌花神傳臺成九品拈一笑笑罷還忝天女  
禪公在都中吾東朱青雷文震爲序其詩云觀察好客接  
引名流所造甚高子榮榮以蔭歷官甘肅寧夏道孫椿源

現任四川渠縣知縣

吾鄉袁清慤公守伺奉使來蜀於市買書見李雨村所作  
李太白詩序心賞之後總督直隸雨村爲通永道最相得  
及公丁艱而雨村被劾公於黃新庄陞見代其面奏贖罪  
未幾公薨哭之有詩云清德名門柱石才一朝星隕共嗟  
哀舉朝盡訝長城壞故吏尤悲泰岳摧曾薦禰衡雲漢上  
能收李白天夜郎同從今不作然灰夢世更何人解愛才公  
有詩集曉嵐先生爲之序云和平溫厚無叫囂激烈之語  
平正通達無纖仄詭俊之意不愧漁洋山人之孫婿曾孫  
啓洸嘉慶己卯舉人號小泉現任雅州府蘆山知縣啓駿

號漱泉現爲四川按察司經歷

諸城太傅劉文正公統勲父榮四川布政使在簡州夢儀  
仗充庭送神人至遂生公公兄弟十人五進士四舉人一  
貢生公居長兩金川之構難也 高宗皇帝布大德救小  
金川返故地俄兩金川狼狽爲奸木果木之變飛章入奏  
上方在熱河急召公問計公曰前猶可恕今猖獗已甚  
不可不張天威 上問誰可任者以阿桂對遂授以定西  
將軍平金川 高宗皇帝知人善任而公贊襄決策實陰  
有造於蜀也公無疾早朝至東華門肩輿中端坐而逝王  
箸下垂其生有自來不誣也按方伯號青岑康熙乙丑進

士初令長沙禁溺女活人無算陞寧羗牧多善政未官簡  
州而生公於此何耶記此事者忘其書名方伯生孫有詩  
云休怪年來白髮新添丁湯餅會頻頻掌紋差喜堪繩祖  
食指先愁漸累人我以江山銷歲月兒從襁褓走風塵何  
時共息枌榆社繞膝含飴味是真文正公有咏柳絮詩云  
嫩綠常瞻鳳輦巡交枝深鎖玉園津遲遲日轉當三月點  
點花飛送暮春曲院飄連斑筍籜遊輪碾伴麴絲塵悠揚  
自趁芳菲節畱取濃陰蔭暍人末句見宰輔胸懷

楊方伯荔裳先生揆與兄戶部蓉裳先生芳燦齊名蓉裳  
工言情荔裳工寫景一婉麗一奇矯蘿裳芳英詩亦明媚

眞一門之盛也荔裳初以侍讀從大學士福公康安平廓  
爾喀緣途紀事狀山川之景甚奇咏東覺山云奇峯出雲  
復入雲招邀欲逐雲中君冥冥綫路萬夫傍仰視如畫重  
累人承之以肩挽以手不用銜枚齊噤口更無石磴容少  
休偶撫枯松暫橫肘當空落落晝見星天近或者星長明  
半崖濛濛復飛雨斜日偏明雨飛處陰晴晝夜變幻奇恍  
惚四顧心然疑饑鷹掠翅去矯矯野鹿戴角來鬢鬢土花  
滿地少行迹千尺藤蘿縈絕壁上頭旌旆乍飄紅遠處衣  
裳惟見白扶搖似覺生羽翰足底萬疊青巘屹天梯休快  
到頂易試問幾時還著地螭蝗山詩工於寫物詩云山深

虎豹藪水深蛟蜃居由來山澤閒毒厲所蓄潄我行歷萬  
山茲山更盤紆危磴苦曲折煙灌交縈敷中途風雨來跬  
步皆崎嶇夜半憩山麓積渟成沮洳有蟲曰水蛭徧地來  
徐徐溼生兼化生聚族而相於宛宛如緣足噴噴旋侵膚  
體類蠖伸屈尾學蠱卷舒潛伏擬蜥蜴游行同螂蛆枵腹  
苦蜷跼饒吻爭囁喘醜爾形齷齪憎爾行趑趄壯士按劍  
怒不能斫爾軀虞人烈澤焚不能殲爾徒踐爾使糜爛得  
水還蠕蠕啜吸偶下咽臟腑愁爾咀兀坐勞周防偃臥益  
可虞眼耳鼻舌身所到皆覬覦誰爲蛙黷噤急共螟蝗除  
尤善釘馬腹噉齧成潰疽可憐拳毛騮頓作汗血駒爾性

實饗饗誅之不勝誅有客代畫策是物非難圖不用薰牡  
鞠勿煩燒菑畚惟當漬鹽汁獲則投諸孟如彼赴燭蛾如  
彼遊釜魚鰕觿如蝟縮宛轉如蠶枯奄然軀殼化朝暮蜉  
蝣俱喜此籌策良相視同擲掄從知辟蠹方酸鹹功用殊  
安能使朽壤速變斥鹵歟因思涉異域奇詭無處無赤蟻  
或若象元蠡或如壺影恐溪蟻射聲戒山魃呼區區螺贏  
微伎倆非夔臚信宿幸無曾焉用併力祛著有衛藏紀聞  
衛藏詩

金匱楊蓉裳先生爲伏羌令逆獍之變拮据守城後以荔  
裳官甘肅布政引例迴避苦州縣繁劇捐部郎旣而長安



大不易居值荔裳回蜀依之主錦江書院文士多以詩求  
正先生雖爲袁簡齋及門詩實不相襲也張船山贈詩云  
頭銜轉覺賁郎好才調寧惟艷體工而艷體實不可及無  
論美人等篇如紅柳古鮮咏者非先生不能工矣柳色偏  
嬌紫塞春推烟唾月送行人傷心定染壺中淚拂面空隨  
陌上塵冶葉恰宜紫茜袖柔條可解綰斑輪小蠻巧按紅  
兒譜併覺今晨舞態新惆悵江鄉別路遙無緣移傍赤欄  
橋春風百結垂珊網煥日三眠擁絳綃底事施朱工作態  
却看成碧轉無膠抵他南國相思樹一種纏綿恨未銷纖  
纖小小愛穠華掠削新粧欲妬花漢殿漫懸連愛縷楚宮

會繫定情紗。頰痕欲暈迎朝日。眉黛纔勻。映晚霞腸斷紫。  
騷空躑躅朱樓十二。是誰家落絮。應同嫌雪飛燕。支山下  
見依稀。啼殘怨血。巴鵲去。舞倦香襟。越燕歸。艷影易迷三  
里霧。舊絲不上九張機。謾誇汁染宮袍色。如此風姿。合賜  
緋尤愛蜀伶。嘗有詩咏之云。十五巴童小。當筵唱未休。新  
裁花袴褶。低擘鈿篳篥。雅步珊珊骨。微波剪剪眸。錦城絲  
管好不數。按涼州。夜雨唐宮曲。春風蜀國絃。祇今遺調在  
宛轉。可人憐。舊事拋紅豆。閒情托錦箋。當歌翻悵悵。無那  
是中年。異方聞此調。悽切苦爲情。蜀魄花邊語。巴猿峽外  
聲。酒闌杯淺淺。坐久燭明明。誰識狂司馬。青衫淚已盈。其

自標題云姱容修態麗而不奇不却羅綺亦調鉛脂蓋以

玉溪爲師云

蓉裳名芳燦曾爲四川安縣令子承憲亦能詩

畢秋帆先生沅撫陝時大軍討金川先生送火藥於四川之廣元又修棧道送駝騾及白蓮教之亂總督兩湖會川兵截殺秀山教匪有功於蜀甚大所至考訂金石修復古跡馬嵬坡楊妃墓久荒爲之豎碑建亭刻詩於石余來川經過記其一云玉笛歌殘喚柰何軍門倚仗涕痕多羽衣法曲漁陽鼓都入迎娘水調歌含蓄蘊藉餘味曲包好使議論者拜下風矣

大學士阿文成公桂平定兩金川武功昭著其孫四川總

督那彥成爲立廟凱旋時過陝西與撫軍畢秋帆沅夜飲  
話舊秋帆贈詩雄偉壯麗所謂金鐘大鑪可陳廊廟者也  
錄其四云西極崢嶸百戰平六年閩外倚專征 王師旂  
鼓從天下上將精靈自嶽生井絡春雲隨大燾潼關曉日  
候行營渡河更喜鐃簫競直挽黃流洗甲兵卻縠詩書天  
下聞戎衣報國敢辭勤金城北望陰成柳玉馬西來勢蹴  
雲翰海初開都護府漳江全返伏波軍丹青久上淩烟閣  
手闢蠶叢再策勲負固如眞不可攻皇威何以令諸戎頻  
年粟轉青天上盡日兵行黑箐中霹靂一聲爭隘入星光  
數點震礪空前山頓失鴻荒雪直爲三軍喜氣融徂征持

角兩偏師獨建堂堂大將旗箸決帷中鋒始合矢飛坐上  
陣無移懸軍已斷三危脊隔歲先傳貳負尸見說指揮如  
葛亮仁風還被受降時

岳威信公長子名濬字厚川幼明敏通經史諸子百家及  
天文地理兵法河道無不熟悉年二十卽膺山東巡撫封  
疆重任常夜靜觀星象漏已三下忽令中軍率兵二百限  
時至濟寧莫知其故次夜濟寧州牧因訟事激民變入署  
劫官殺其妻孥中軍帶兵至登時擒獲亂民咸以爲神公  
亦率兵繼至察其首惡論如律餘請赦免昔威信公罷任  
家居一日命具祭辭墓曰 皇帝詔將至我行矣不日

詔下起公征金川蓋必有所見矣中丞特傳其家學獨知  
變在濟寧又知時不可緩是爲奇耳

里居時見舊邸抄御史李漱芳叅額駙尙書公福隆安家  
奴藍大醉打金陵酒樓該城給事中永明陳憬中僅予薄  
責不無有心瞻徇福隆安身爲步軍統領以本府家奴在  
外滋事平日約束不嚴亦難辭咎 上嘉其有膽識賞給  
事中其鯁直可想來川見李兩村所紀乃知其天性純孝  
母亡弟幼手抱口哺立心制行以聖賢爲法自題小照四  
圖其白雲斷雁一篇尤惻惻動人詩云我年十八時慈母  
弃兒逝五弟襁褓中日夜啼不止一聲一腸斷旁聽涕灑

滿老父重悲淒摩撫嗟何恃兄嫂兒女牽顧此復六彼我  
時尙未婚眠食責諸已包裹布與巾中夜再三起隣媪乞  
乳盡軟嚼糜粥飼得其爛漫睡背燈究經史放聲口若箱  
回顧淚漬紙如是者六年通籍成進士拜命官農曹我父  
聞之喜遽攜兩弟來觀我出而仕自冬越殘春日厭緇塵  
昧柳風三月和劒閣一鞭指季弟遣隨行五弟畱京邸牽  
衣盧溝橋離別從茲始別行片言勗勵節報天子吾老力  
強健毋心繫甘旨擲身上馬去淚落渾河水誰料一月程  
風露疾難理可憐逆旅中竟作捐館地生無以爲養死無  
以爲禮嗚呼天蒼蒼此恨無涯涘幸賴邑宰賢高義脫蹊

比當我未至時觸事自經紀及撫柩呼號婉慰節哀毀至  
今欸曲情緘封在骨髓是時九月交秋風吹菊蘂扶病輓  
靈輻雲棧經迤邐猿聲天上鳴慘切入我耳峽勢日邊迴  
碑罍折我趾我前咆猛虎我後叫蒼兕行路飽艱難安厝  
事始已庚寅季弟亡乙未兄又死相距數載閒零落已如  
此遺七八孤雛嗷嗷竟誰倚雖有小弟存生事出如螳哀  
哉骨肉懷生死隔千里我欲踏寒郊陟岡陟岵岵白雲生  
遠天鴻鴈度隴坻雲盡鴈行斷極目空指似因將酸寒心  
寫入圖畫裡寄與後來人此意莫輕視

國朝四川理學名儒以中江林愈蕃爲冠字青山號澗松



父歿哭踊幾絕三年斷葷酒哀毀骨立喪母亦如之仲兄  
歿亦斷葷酒三年乾隆辛未成進士謁選時有勸其染鬚  
者正色曰事君以忠入官之始卽塗飾面目以求榮他日  
利害有大于此者能無患得患失之念耶任湖南鄱縣終  
日端坐公堂兩造面稟卽時斷結暇集子弟講課經義善  
政不可枚舉大府將加殊擢念伯兄垂暮引疾歸貧幾不  
能行門人裹糧以迎之平生嚴義利之辨獨處如對聖賢  
盛暑不去衣冠言動有法教人先德行而後文藝著有青  
山集三十卷古文有大家風詩亦超俗病亟神識清爽作  
觀梅詩末云幽香全體足畱待後人評蓋自道也道光辛

卯入鄉賢祠大冢宰湯敦甫金釧謂人曰雖入兩廡不愧生在聖門必居德行之科論人者以爲知言

周公萬殊字同川南川人乾隆辛酉拔貢性至孝母病危刲股肉以進中夜引錐刺血書表告天願減已年以益母壽感異夢母疾愈祖母令狐氏因姑年高齒落每晨盥水拜姑而乳之太守送扁曰事姑一等宜其生孝孫也公娶楊氏亦孝在室嘗割臂愈母疾公通判湖南爲巡撫陳榕門先生所知屢委審辦巨案有告謀逆者其人實痰迷妄以親族相識諸人錄名冊搜得焚之案得以銷有子八人稱周有八士吾鄉林汲先生爲作周孝子傳又爲作歌

節錄之云割股和藥已母疾篤孝一念天所憐哀禱祈神  
神降福子有八士孫曾繁長幼勗率以孝友山村半夜聞  
誦絃維農力田自有秋科名拾取如蟬聯蔚爲南川之望  
族不數浦江有義門可以風矣

子四舉人一拔貢  
餘廩增及國學

李雨村調元與弟鼎元驥元先後入詞館一時有聲藝林  
余家藏童山詩集紙板最精較漁洋山人所刻全集猶爲  
勝之既來川所見則惡劣不及遠矣未知何故舊藏雨村  
年譜一冊鼎元和叔編集塗乙宛然所刻函海得吾鄉周  
林汲先生永年鈔本書三十種後屢索不還林汲先生博  
極羣書曉嵐宗伯薦修四庫全書極一生搜求之力所得

半歸雨村教匪之亂其族人乘機焚萬卷樓爭攜藏書以  
去其未盡者亦化爲雲烟矣趙雲菴之甥劉君來刺綿州  
雨村指名求追終未能得雨村以養優被劾林居猶自教  
歌舞醒園池臺之盛甲於西蜀復又鑿小西湖名囷園今  
皆廢爲田疇菜畦荒陂矣聞其妹季蘭亦能詩小妻萬氏  
有詩云滿院花如錦風光別樣新綠楊三月雨青草一年  
春畫閣眠初覺黃鶯囀正頻拈針時不語爲憶未歸人林  
汲先生孫溪亭宗耀補四川崇慶州州同升貴州廣順州  
知州以卒自其祖父與予家累世交好來川時時相晤今  
其子寶傳羈蜀難歸藏書無存與雨村之後同一陵夷可

歎也

李鳧塘驥元編修乾隆乙卯典山東鄉試所取文極清真  
一洗腦滿腸肥之習而是科聯捷無人後亦少中進士者  
豈文章清氣與福命不宜耶在三李中不喜馳聲華廣結  
納而薰習漸染詩自可取如遊兩粵詩云江連龍水驛山  
接象州城獐長腰橫劒蠻娘髻插花鷓鴣深箐伏蝴蝶異  
花眠皆可喜者兄墨莊鼎元使琉球集球雅所著師竹齋  
詩文集惜未刊行其才氣宏雅挺拔久爲名輩推重而兩  
村詩文後人或不滿之亦名高則責之必刻耳如宋宮詞  
百首華貴蘊藉豈寒儉人所能學步

張邦伸號雲谷初生時父夢白猿躍肩上化童子自稱瑩  
華山侍者幼穎悟過人乾隆己卯舉人丙戌初舉大挑列  
一等借補光州知州旋補襄城令多善政歲饑請帑計賑  
五十餘萬口調固始將不次擢矣以母病告歸有李道人  
者國初鎮遠將軍芳述之弟也年百餘歲人以爲仙公遇  
之於沐城曰君有夙根可授金丹雲谷方需次補官以祿  
養辭道人曰他日急流勇退人也告歸時年方四十五後  
竟不出過孝子姜公故里詩云人生重本根至孝動天地  
菽水期承歡詎以三公易卓哉姜士遊允無忝所事閨中  
有賢婦尤善承親志鷄鳴汲流泉辛苦靡不至中忽遭責

譴忍痛百憂積紡績市珍羞鄰母招共食以此格慈親嘉  
氣鍾祥異雙鯉出重淵赤眉歛兵避至今丙舍旁江水流  
清泌嗟予亦人子內顧心如刺悲起白楊風萬古愁雲閱  
著作甚富藏于家

市中偶買白綾舊帳額畫梅花上有題詩行草相半視歎  
則中江故都憲孟鷺洲先生筆也不知詩係自作否以前  
輩故物珍之後爲人竊去先生本籍山東遷居來蜀幼聰  
穎工文章乾隆庚辰進士官山東監察御史歷陞憲副乾  
隆戊子充貴州鄉試副主考悉心校閱不輕去取久之元  
猶未定有同考臧獲夜見黑眚自簷擲下驚仆公疑本房

有佳卷屈抑相率共閱卷計原發之數少一本開箱得之  
蓋本房喜其文細批密圈欣賞之至忘其違例也既悟而  
悔乃不敢薦公謂足冠通場各房皆以爲然惟正主考不  
可曰佳則佳矣但房官不應如是公曰例無明文將奏請  
監臨聞之爲解釋遂定元揭曉果貴陽名士蕭鳳翱也事  
母最孝皆稱爲得人先生名邵字少逸鷺洲其號也曾孫  
孟丙暄字午垣邑諸生家貧親老方以遊幕糊口

王垂重山東諸城監生任汶川令厯辦軍務著有勞績保  
舉以知州補用嘉慶三年署忠州教匪徐添德等擾川東  
及州境率生員差役鄉團禦之奮勇殺賊力屈死之祀昭



忠祠祭文有曰維公萃東魯之靈異作南邦之屏藩有勇  
知方教既深於訓練舍生取義氣更烈於沙場惟其忠愛  
居心不愧唐宋名將所以士民向義直追周漢忠臣得此  
雖死猶生矣繼其任者爲趙來震山西崞縣進士修城垣  
練鄉勇賊眾圍城竟不能克王君若堅守亦未必遽死而  
志切滅賊不計眾寡何其壯也趙君有勸民十歌詞俚而  
意摯取民易曉戎馬之際更興學校與諸生講論經史二  
君均堪不朽

銅梁王公汝璧字鎮之福建巡撫恕之子乾隆乙酉解元  
壬辰進士汝嘉弟也聞諸先君曰公幼孤家貧就婚於錢

香樹先生以布衣謁見先生私語人曰大員子何樸野如是及試以文驚曰此國器也厚待之乾隆元年成進士由山東按察使歷仕安徽巡撫終刑部侍郎無子撫兄汝嘉子庚如已出不問家人生產卒後家貧如初兩世封疆大臣以清白傳家可風也著有梁山人集詩宗韓孟其婿吳鼎宰渠縣爲刻之有脂玉詞蓮果詞藏於家中丞號樓山過潮州感舊詩云金山遙對鳳凰洲策馬崆峒憶舊遊二十七年如昨日八千里外是并州空餘大樹翻斜日尙有遺丁說故侯路過西州秋欲老舊參軍也雪盈頭佳句如江水勢從落日下海風聲送晚潮來南浦柳牽千里思東

風梅返去年魂烟波落日雙蓬鬢風雨扁舟一短檣萬卷  
讀書兼讀律半生憂道不憂貧袁子才詩話載前首非其  
至者沈歸愚國朝詩別裁所收亦片甲耳余與先生孫學  
坡同硯席爲錄數聯以見美不勝收耳

學使吳壽庭樹萱有知人之鑑所賞拔如漢州張懷淮王  
溪丹稜彭田橋蕙芝金堂陳竺山一泖及溫江劉芳皋潛  
皆知名士先生吳縣人初名傑乾隆庚子進士與兄曇繡  
齊名臨江試院夜吟云氣入蠻墟冷星懸斗帳明江流圍  
小閣灘響逼殘更遷謫人何在艱難恨未平雲安前路近  
時有杜鵑鳴將至嘉州范六泉同年刺舟來迂賦贈傍樓

城郭鬱參差近水人家亞竹籬橫碧山光動雲杪殘黃楓  
影照江湄客當晏歲遊偏劇詩擬高標句亦奇花縣今宵  
遇賢主荔支樓畔卸帆時嘉慶己未復以監司來蜀署鹽  
茶道卒于任

壽庭子友簾隨學使任至忠州謁陸宣公墓作七古長篇  
越三十年來爲刺史亦異事也詩云玉虛觀南宣公墓崇  
封四尺靈魄厝生前金石矢忠誠肝膽而今百靈護我來  
臨江纔十日日日屏山罨朝霧今朝蠟屐弔孤墳招要同  
喚神溪渡扁舟一葉爭上游回湍激石石齒怒霎時彼岸  
已誕登絕頂捫蘿不窘步蒼苔碧蘚何無情埋沒殘碑無

計數我來剔蘚更掃苔展拜公墓傷公遇公當少年登進  
時吏治循聲遠邇布君子大受亦小知委吏乘田同掌故  
於時河北正紛爭各據一隅稱節度車駕播遷幸興元急  
難乃見儒生素詔書徵發千百言奮筆疾書如夙具罪已  
之詔下山東心感涕零浹耄孺賴公帷幄得參謀一言遂  
復唐家祚是時天子之富在大儲無取瓊林大盈庫下民  
膏髓恤自上 兩稅而外在均賦迄今奏議勒成書千古  
流傳寶大璫惜哉相臣任不久國事半爲延齡誤國賦何  
來本分錢錢由科配實民蠹從來忠奸不兩立小人道長  
成黨錮惟公不負讀書心嫉惡不辭與物忤一朝遷謫在

臨江蜀道吁嘻悲行路宦遊黜陟何足論所惜施陳未盡  
措閉門避謗不著書一卷藥囊閒集註忠州亦足表臣忠  
尙冀君心有時悟如何徵詔下長安人不生還已告祔了  
無遺奏達天聰葬仍西嚮遺命顧迄今祠宇半摧殘綠水  
青山自朝暮更無翁仲戴山花蔓草荒烟半偃仆讀公奏  
議想公心丹心惟有青天訴低徊終日渡江歸悵望西風  
黃葛樹

衷雅堂以堦乾隆丁丑進士三十九年赴金川軍營後與  
嘉慶丁丑進士分發來川者敘先後同年有詩記之主成  
都芙蓉書院最久年九十三刻詩名畱耕堂集從軍時沿

途有詩曉發成都云十萬王師出益州櫟槍未掃塵  
宸憂書生豈有封侯骨也上籌邊百尺樓灌縣云灌城西  
望鬱嵒隆萬壘岡巒一徑通甌脫更無桑柘地居民風俗  
半羌戎汶川縣云奔流如箭吼如雷巨石岢岢勢欲頽野  
渡扁舟何處問行人都向竿橋來保縣云蠻女蠻郎負米  
行山前山後踏歌聲淒音苦調無人會似祝將軍早罷兵  
幙頭嶺云石磴彎環馬足輕停鞭笑指白雲生山腰一陣  
天風過吹落仙人玉笛聲孟谷云參天松檜密如蒿白日  
陰森瘴霧高安得移栽三百本北窗欹枕聽風濤雪山云  
雪山山外雪如拳正是江南刈麥天怪底蠻酋貧徹骨恆

寒那得屢豐年三松坪云水過雪嶺盡西流天到蠻荒總是秋莫訝征夫頭白早從來邊地易生愁雅堂仕至雲南曲靖府知府年八旬餘尙生子今食餽矣嘗晨過友人家進點心視之曰此不足乃多備湯圓食五十九時年已八十五歲六世同堂人稱罕有

周肅齋先生士孝又號松崖乾隆庚寅恩科舉人官直隸遷安知縣與先大父及林汲先生爲石交兄弟八人以科名文學顯先生早達爲縣令垂三十年及卒婦孺歸里屋與田畝爲家眾所有不能再析乃徙涪州共安寒素先生厚重寡言詩亦醇雅無輕佻浮豔之習九月得益齋六弟



都中書分手巴山後於今已七年凌霄君有路入世我無  
緣回首幾眉月愴懷五嶺州愁心揮不盡又得展鸞箋去  
官惟望歲天勝渾難爭春信愆寒雨秧針度早萌泛舟湘  
浦遠懸磬旅魂驚回首思鄉里巴渝米價平又寄賀靜齋  
三弟營新宅云長懷香樹栢楊灣連袂當年日往還鳥語  
聲喧人影外稻花香送夕陽閒林泉憶昔千章合結構知  
今百堵環歸路何時尋舊約倚簷共看萬松山

合州小白華山人張西村乃孚乾隆癸卯舉人是年荀始  
生也刻有問濱餘草續草吳白華孫補山楊蓉裳諸先生  
俱深賞識咏吳梅村云江南不放白衣還詩史居然老杜

篇一曲琵琶掩客淚開元如話李龜年何等風神花蕊夫  
人宮詞殘碣不知在何處西村和彭栢里詩云杜鵑聲裏  
悵秦天一片殘碑斷不連百首宮詞零落盡奇搜今付米  
家船好古人從江上歸名場欣賞興遄飛風流勝唱無愁  
曲魂斷青山白紵衣不獨半江秋水碧于染一片夕陽紅  
過山爲張雲谷李雨村所賞也集中有錦城別王學坡謝  
周光圃進士題拈髭覓句小照二詩學坡銅梁人名庚嘉  
慶庚申舉人光圃南川人名立瑛癸酉甲戌聯捷二君年  
少與荀同受業於先君後音問久阻來川訪問則學坡任  
涿州牧旋卒光圃部選將及而歿聞二君與西村唱和西

村之詩可見二君詩不可見矣閱問濱草悵然記之

震澤沈東里裕雲乾隆丁巳進士爲崇寧令旋解組主錦  
江書院嘗遊山左自蒙山厯齊河至濟南懷今弔古沿路  
有詩有咏蝓詩最妙赤體何曾掛一絲他生羽化尙難期  
藏頭便是回頭處失足偏當斂足時空有堅心同朽腐漫  
無勁骨可撐持不如抱葉長眠好飛鏤當前悔已遲在蜀  
送邛倅徐履長赴拉里云時局深沉我慣經知交落落感  
晨星同心剩有徐元直車笠相逢眼倍青回首東南路渺  
茫西行萬里又羊腸一官久作臨邛客今日并州是故鄉  
赴川畱別鄉人有句云十口依人原有地一行作吏便無

家後竟畱居於蜀刻有石室存稿孫曾煇號南村孝廉隱居教授工詩

宛平查中丞禮號儉堂舉博學鴻辭報罷初任四川寧遠府歷陞布政使金川之役運糧通路善撫馭得夷人心著有銅鼓書堂遺稿於邊疆風土最悉中秋日陟飛越嶺云征人忽有逢佳節奇險當前感蕭瑟連峯疊嶂青復青密樹周遭葉未脫去年此日升菴中蟾魄穿林皎如雪人從荇葉踏玻瓈閒聽僧樓吹玉笛今年躍馬向西行高攀相嶺更飛越泉流遶磴轉折來山色巒光半天劃崎嶇跋涉不知勞人事參差誰料得浩歌馬上膽氣粗壯遊垂老豪

無敵須臾騰蹕登絕頂下界煙嵐盡掃跡眼空萬象身御  
風影入雲閒何處覓喘定凝神眼乍舒遙見居民在咫尺  
化林坪外動軍聲向夕營門月華白渡鐵索橋昔讀桑欽  
經略知大渡水源發西徼西流入底羌裏瀘定以地呼實  
爲大渡耳上下名不同地異水卽此蜀疆多尙竹索橋松  
維茂保跨江饒幾年頻陟竟忘險微軀一任輕風飄斯橋  
鎔鐵作堅鍊一十三條牽兩岸索重十萬斤巨木盤根繫鐵重  
橋亭對峙高雲漢左治犀牛右蜈蚣怪物鎮水駭龍宮洪  
濤奔浪走其下迢迢波際飛長虹橋長三十一丈碑石穹窿耀宸  
翰輝煌金碧崖閒燦橋東偏恭立康熙四十年御製大碑白馬青衣日往

來低頭不敢閒瞻玩規模宏壯足大觀層層棟柱圍雕欄  
驛傳烏斯內外藏去回無復違驚湍我今奉檄緝羣盜嘯  
倚商飈恐落帽攜書擔劍橋上過乃取鐵橋爲近號中丞  
搜楊升菴書百種惜未刻

胡書巢德琳廣西臨桂進士夫人袁氏也與簡齋香亭爲  
內兄弟隨園詩話載其五古能狀險峭之境乾隆十八年  
爲四川簡州牧復任山東濟陽縣調歷城陞東昌守以幹  
練稱所至修志書博綜典雅可觀在川任彭山時拜漢征  
南將軍岑彭廟長歌人苦不知足得隴復望蜀十二公孫  
已定期五銖炎德知當復區區子陽井底蛙習漢吏事開

成家不據瞿唐據虎牙妄引圖讖爭矜夸訛言白帝堪絕  
倒高山赤甲空枯槎白水真人定隴右西州隗囂旋授首  
日獻三捷撤其藩斗絕一隅猶困守征南將軍復堂堂遠  
自夷陵屯津鄉帝知明習善水戰浮橋一炬何輝煌墊江  
都江順流下倍行不復分晨夜武陽徑拔趨廣都風馳雨  
驟人爭訝將軍用兵真無倫豎子投杖驚猶神不知面縛  
丐餘命迺逞故智戕厥身前年遣盜殺來歙陛下哀憐垂  
涕泣今年山忽兆彭亡亡奴夜發嗟何及將軍軍令嚴秋  
毫大星宵隕靜不囂栢人知幾亦數定蜀人憐重還悲號  
嗚呼躍馬成黃土將軍廟祀昭千古我來再拜對斜陽欲

賦鐫歌追樂府王喬仙跡歎悠悠彭祖衣冠共一邱凜然

忠義餘生氣豸節烏私錦水秋

孫元鉢中進士現爲部郎

鄭石幢方城與弟荔鄉方坤齊名嘗夜賦寒柝限雙字荔鄉云遲久更疑六干隅唱或雙石幢云偶作行歌互應驚好夢雙座客歎爲警句石幢爲蜀新繁令後主錦江書院荔鄉官山東爲兗州太守調濟南少極兄弟對床之樂晚有兒女閨房之樂四女玉臺雲蔭青蘋金鸞皆工詩官居退食日課四女拈毫分韻可謂風雅萃於一門荔鄉先生刻有制藝涕出而女於吳題文吳宮花草一聯友人每酒酣擊節自焚舊稿作七古一篇有化爲蝴蝶穿葵戎句用



功深矣

學使吳冲之省欽江蘇南漚人博學工制藝著有白華詩文集屢掌文衡紀曉嵐先生戲拆其名云少曰豈能識文字欠金何須問功名前輩雅謔非以爲定評也乾隆三十七年視學來川有武侯征蠻故道考三峽考爾雅臺考辨尹吉甫不在瀘州甘后墓不在夔府楊貴妃非生於蜀荔枝不貢於涪論古有識多發前人所未發羣豬灘云白蹠烝涉波夜漲高數仞膨脝伏波底聚族肆砢磷爲殯爲艾猓睢盱競觀鬻磨牙吞客舟立啼作霆震歎涌白浪花漩渦列圓陣非無舵與篙激裂斷寸寸一起勢一落魚腹葬

同殉連朝苦札水格豚恃忠信擬操屠伯刀肯緊恣排擯  
長年啓利涉趨避貴精慎千指爭一漕整暇如臥鎮汔濟  
色死灰秋風老霜鬢瀘沽峽云新橋峯影迴穴磴度單騎  
下吸飛練光滌滌倒層翠銅槽滙淨潏鐵厰溜澎湃稍見  
稊稊田引流獲霑漑浩然朝金沙不受廣源治河身忽縮  
行兩壘迸一氣元素幻須臾椒圖恣挈戲陰沈鹽井溝絕  
峽那可縋重巖削鐵色鏤鑿似孤隧有時十字裂樹根挺  
若臂善崩訝沙性萬木支九地碑手摩空嵯啞泉駭狂醉  
士非吞炭俠師合銜枚濟且隨猿鶴羣望望趁墟肆峽有啞泉  
寫險奧之境如見更有藏香藏棗藏普魯諸詩足徵土物

篇長不具錄

葛荃溫江人雍正閒進士先守貴州銅仁後調他郡值  
高宗南巡行宮修造不及雕檐孳窻皆以紙糊裝飾見者  
以爲真也又出巧思命工織絹寬幾二丈長稱是以被絮  
濡墨大書中字懸殿廷召對賞其書法命收卷帶之又以  
行宮華而不費深加褒獎學問淵雅地紀星躔律厯皆有  
著作宿唐奉若鄉莊鱸堂閒錦幔涼雨拂華筵杯泛珊瑚  
酒香分玉井蓮花風清似水臺閣靜如仙展矣徵嘉會春  
容賦大篇孫名岷

葛岷號頤山溫江人父牧雲南建水州使歸就試時年僅

八歲邑令以爲神童拔冠一軍吳白華學使取古學第一  
入泮某方伯爲其外祖新繁楊廉訪所取士極器重之夏  
日與幕友咏夜來香試使爲之頃刻百韻幕友浙江名士  
也見之吐舌曰童子軍不可當也後中嘉慶戊午鄉試補  
會理州學正卒子士麟字希陵收其零篇彙爲一冊所存  
不過十之二三耳和少我趙學博署中古栢詩云卓然亭  
畔栢偃蹇一心堅品向黌宮老神從藝苑全植根滋雨露  
挺節飽風烟木與人同樹隆隆作棟賢士麟能詩有集亦  
善畫

夔州仲太守廉靜有政聲郡境有灘名九墩子石激水潮

舟多損壞欲平治之廣積石工親臨指示無閒風雨工在  
逆流盡力開鑿旋即眩頭暈不能舉手又命他匠下水  
互相代替倍給工食石去灘平始回署忽得暴病終日書  
風雨雷神四字一夜有舊役求見闍人阻之役曰上帝因  
官開河鑿石利濟生民命爲巴縣城隍明日子時到任我  
先行矣言畢仆地卒次日風雨大作雷電繞屋仲命家人  
具衣冠端坐而逝後扶襯歸里路過巴縣謁城隍座上神  
像與仲無異舊役與東廊皂隸亦相似邑人爲之立廟於  
九墩子灘上行人有難神必夢示舟過此必焚香以拜載  
此事者忘其書名書未載仲之名諱查通志仲名純信山

東萊陽貢生乾隆四十一年任疑卽是也第政績不載於通志未解其故紀此事之書似非鑿空苟於公爲鄉後進恐公之久而湮沒謹錄於此後之修志者或博採而有取焉

王騫字軼千膠州人乾隆丁巳進士改庶吉士歷官順慶府知府海上長城云舊是防倭地居然重鎮強烽烟搖海月戍角散秋霜臺圯魚梁冷城空戰壘荒誰將千古恨興廢問斜陽

周澹齋士忠松厓先生之從弟也好讀書喜治古文詞性恭謹夏不袒不扇一履三年如新事母極孝因母善病旁

及醫術兼以全活多人以明經終平生詩酒自娛惜稿多  
散軼九月五日重遊雲都寺云我有愛山癖如登密友堂  
何曾嫌數見况乃近重陽流水仍終日征鴻忽兩行得詩  
持問菊應笑馬蹄忙

徐樾字茹堂江蘇鹽城人乾隆戊午舉人會試明通榜十  
九年補雙流縣勸農教士煦煦如家人至弭盜剔奸洞燭  
無隱春日勸農卽事云嫩柳含金古路旁郊原一帶盡農  
桑兒童竹馬來深巷葑屋書聲出短牆雨洗紅塵春草綠  
風疎翠隴菜花香田家事樂予心樂麥飯蔬羹味轉長在  
任十一年去逾年而小徐公至名曰明字曉窗江西奉新

人乾隆丁丑進士訟簡庭閒工爲詩文謁商子祠云商祠  
獨傍孔牆陰猶是當年北學心經授韋編薪火在碑橫牧  
馬夕陽沉名賢芳躅隨流水下吏孤衷寄素琴此日登堂  
一迴溯春風吹徹碧林深按商子名瞿魯人終身未嘗至  
蜀因蠶叢治瞿上遂附會焉指一冢爲墓並立祠雖無據  
亦見人景慕先賢之意也

董詢字企泉號小池山陰人韶年喜寫蘭竹後給事部曹  
議敘得四川主簿罷官後攜琴書徧遊蜀中名勝詩益鴻  
放畫愈雄奇爲梁瑤峯余秋室兩先生所賞著有小池詩



何明禮字希顏崇慶人乾隆己卯解元高才博學喜作詩  
亦深于古文潦倒場屋遊山左南川周松厓先生宰禹城  
客其署中禹城當孔道羽檄冠蓋日夕不絕松厓愛客好  
士希顏負奇尚氣爲遊仙擊劍之學賓主相得無間希顏  
病作詩謝主人云羨君老手膺嚴城雷轟電掣日送迎吟  
畢化去未幾松厓先生丁艱素與先大父小山公善來卜  
鄰焉希顏嘗登太山乾坤亭云長子乘乾闢天門手握靈  
樞定乾坤兩儀交泰初氤縕渾淪元氣此中存日居月諸  
東西軒丈人天柱作籬藩知水仁山序弟昆邱陵拱衛列  
兒孫二十八宿手可捫峭壁巉岩虎豹蹲飛泉千尺浪雷

奔觸石膚寸湧雲根龍峪開闔相吐吞綠霧蒼烟迷朝昏  
天鷄叫破扶桑殿蒼茫俯視萬家村濟潔汶泗帶一痕千  
山蟻聚與蜂屯松濤颯颯風雨翻蒼龍捧駕丹鳳騫花閒  
草軟鳥不喧採藥何須問桃源手攜姪女過南園鑿開石  
釜調饔飧整理絲綸釣修鯤飽飫沆瀣養丹元仰天坦臥  
舒心魂栩栩然一夢謁天關蹠蹠忽聞響脚跟諸君何來入  
吾禪

陸登榮宣公三十四代孫聞祖若父言公事蹟墓在四川  
忠州卽有志省視閔四十年將放學差時得列名筮之得  
鴻漸於陸果視學來川適忠州牧武烈新修祠乃爲文告

墓作詩志喜云唐家天子承先業山河錯繡海外截一朝  
太阿遂倒持四方雲擾金甌缺天心眷顧未改移嶽降斗  
南產英傑宣公崛起黼王猷上下不負志早決翰苑文章  
真文章秉鈞氣節真氣節至尊蒙塵司樞要補袞拾遺籌  
征調元蛇封豕捲地來解圍只須一封詔開誠布公著謙  
光青齊將士相泣弔鐘簋不遷舊物還穆穆雍雍復清廟  
垂拱方謀不下堂欲把乾坤次第張經綸初展調羹手小  
人道長空徬徨聚歟之臣裴氏子頻將培克結君王相國  
憂勤心悄悄凜然白簡勢飛霜天地閉兮賢人否遠謫忠  
州幾千里陽城哭奏亦何爲十年別駕淡如水醫方醫國

可醫民杜門却掃究斯旨公騎箕尾歸九天抔土長封翠  
屏裏清風百世道常存禋祀千秋惹淚痕劫灰燒盡餘焦  
土野老何處獻金罇文翁造士揚帆下鼻祖相承見耳孫  
俸錢費盡新祠出刺史董作百工掄臺榭崇宏倚疊嶂香  
烟繚繞擁孤村從此東川添盛事豐碑不朽勒雲根

俞爾昌字麟含江蘇婁縣人嘗夢遊一處題曰菩園因以  
爲號乾隆十七年成進士選仁壽縣入署右軒題菩園二  
字署後峰巒樹木石磴皆厯厯如舊遊縣北貴平故城左  
有石觀音廢棄巖穴閒荆棘叢生岩前棗樹一株大可圍  
二三尺生瘿甚巨忽破得一像如人牧童相與竊香禮拜

適販牛者經其處牛病不行禱之蹶然起傳播四鄉攜老  
幼拜祝者日萬餘人俞君聞之曰是何妖物敢惑吾民親  
至其處持斧破木人爲二命工伐其樹遷石像於貴平寺  
妖遂絕興學校築水堰日不遑息病急慨然曰菁園有兆  
其終於此乎果驗有詩云十年前此夢中遊滿眼青山翠  
欲流幻景忽眞眞亦幻雪鴻畱影記休休

楊卓字鶴然號立堂江安人乾隆己丑進士九歲能文豪  
邁不羈長於詩賦望海吟一篇人尤推服詩云於戲譖譖  
我生之初但識岷江水碧騰白湧幾千里邇來掠漢逾沔  
浮涇亂渭入黃河中原大野揚洪波夙昔探奇興不極盧

龍塞上來高歌碣石之傍觀海口凌虛毛髮爲抖擻半生  
始得豁雙眸狂呼大叫魚龍走大地何遽說無垠寥天已  
被海波吞不然四面皆巨浸天於何處托其根沐日浴月  
渾閒事鵬運鯨遊眞兒戲此外縱云有九州九州之外更  
何地往年 聖主封琉球琉球不過海中洲今年暹羅來  
貢獻暹羅亦是島夷儔若有大於神州與赤縣胡爲千年  
萬歲無人見興來且看眼前波驚濤駭浪相交扇倏高倏  
低起伏似岡巒一呼一吸震盪如雷電料得鱗儔价豸無  
寧宇不信馮夷海若有宮殿此時紅日上東隅百靈萬怪  
咸奔趨我欲從之買珊瑚我欲從之賒明珠珊瑚明珠都

不愛我欲從之坐鰲背會當送我蓬萊山獨立遙岑吸沆瀣

周立恭字伯寅後以字行乾隆甲寅舉人任浙江永嘉場鹽大使余來川時懸車十年矣前歲壬寅以所著六事箴言自南川寄贈爲念先君舊好云性好爲詩而成篇卽焚棄自嫌不工他人掇拾其餘名焚餘詩草重過三峽云平生山水癖夢想是夔巫峰影摩天合江聲入地無雲閒神女廟風肅武侯圖絕險舟行慣翻教胆氣粗擬桃花源行武陵溪口蒸紅霞夾岼桃開十里花下界紅塵飛不到當年種植定誰家花枝缺處花枝補聲聲流水鳴今古我欲

因之問主人祇有桃花作賓主漁舟欸乃搖春來無意看  
花花正開活水源頭知近遠一樹一歌去不回去不回兮  
歌忽止回首人閒已萬里桃花自落舟自行一峯飛來壓  
舟起烟蓑雨笠等閒身逢山便作登山人船流在逐桃花  
去恐負桃花洞口春去去初疑路不通漸聞雞犬喧雲中  
此行如夢乃大覺別有天地開鴻濛福地幾生修得到方  
壺員嶠將毋同文成徐福皆妄誕不如一棹武陵風我聞  
羽化世亦有何事耕織乃吾偶方知神仙非異人但無甲  
子與官守自從逋客謝塵寰也遣流水到人閒人閒烽燧  
那得見却疑白二猶秦關說罷滄桑淚沾臆舉酒博歡歡



未極客心頓逐春水生要向人閒說消息此中消息莫輕  
傳今日相逢亦偶然待到花時君再至此花一笑一千年  
大雲寺松石歌大雲寺雲爲峰鞭龍畊雲僧種松松老成  
龍雲不散一一化爲怪石畱奇蹤風到雨到日不到古今  
一氣青重重但有鳴禽飛下上更無紅葉凋秋冬我來小  
立眼雙碧松聲石色填心胸冀北名山遊八九如斯奇特  
驚未逢福地緣慳天欲暮呼僮火急尋歸節不見山中寺  
時聞雲外鐘下山十里九回首却疑我未到處猶有千松  
萬石皆雲封

楊振麟字信節號裕齋康熙乙酉舉人陝西平羅縣知縣

秉性疎放人稱爲二風子欣然曰名甚當吾意作長歌云  
天覆地載何茫茫巍然七尺於中央年過四十古稱強丈  
夫意氣安可量何事羈縻天一方蝸之左角爭顯揚闔簪  
羣飲半維桑秦越之人亦迎將豈無冠蓋甘翱翔我心如  
醉久相忘挾策樛蒲各亡羊晤韓合傳誰低昂春秋功罪  
惟蒼蒼默然念此神爲傷寂寞金臺日月長飽餐脫粟合  
清狂有時雄辨神洋洋有時鯨飲吸千江有時顛倒著衣  
裳有時黃口同徜徉狂歌疾走氣如狼委蛇徐步安且詳  
浪譁笑傲率其常澄墨搗辭叶宮商呼之不應傲羲皇揮  
之不去酒槽傍秋風夏日互炎涼九衢曲曲比羊腸瘦骨

稜稜貌不揚恬然履此如康莊感君尊我中心藏二風  
號何芬芳揚泥哺糟逐隊行何人赫赫有聲光繫予實至  
而名彰毅然受之勇且剛若有人兮堪頡頏願爲爾宰永  
相望

幼時讀時文健爲李公義峯作也集四冊雖非名家亦逢  
時之技公家貧力學由拔貢考教習後中乾隆辛未進士  
分發湖北爲縣令調繁麻城有能聲歷仕至湖南荆宜施  
道爲太守時於春風亭宴屬吏作詩四章從容和藹規勸  
殷殷如見其人惜忘其詩矣及來川閱通志公傳未甚詳  
公名拔子元模乾隆乙未進士亦能詩龍池春漲云一鑑

橫開百畝池春來渥澤自天施凌空遠塔浮清影夾岸垂  
楊蘸碧絲得意鳶魚飛躍處會心風月到來時龍文浩蕩  
波千疊好在伊人自領之

顧晴沙觀察光旭權蜀臬喜爲詩袁簡齋採其句入詩話  
李雨村詩話亦載其咏惠陵云南陽諸葛眞名士天下英  
雄惟使君又題石溪亭云大峩峩峯外幾峯青行盡岷江似  
列屏依舊桃花春水綠石溪人去已無亭數莖白髮柰山  
靑秋雨秋風冷畫屏閒與畫莊評邑乘無名詩史石溪亭  
高梁山道中云泉聲山色送輕輿空際林巒畫不如疊湖  
雨深叢篠密半坡雲薄小松疎隔烟犬吠兒呼犢傍水黿

喧獺趁魚絕似江南好風物濃陰四月插秧初所選元人  
詩博觀約取品隲精審人有小傳亦元遺山中州集例按  
先生由黃門爲寧夏太守遷擢來蜀清操飲冰卹商愛民  
暇卽鉤簾讀書字法顏魯公詩宗蘇玉局與吳白華查榕  
巢沈澹園唱和成集以事去官送者萬餘躋堂捧觴先生  
舉觴大酬商民哭先生亦哭扁舟東下徧覽峨眉凌雲之  
勝所至題咏不復作出山之想矣

姚一如先生令儀松江婁縣人爲諸生時往杭州見同鄉  
錢塘令徐芳圃恕將以筆墨入幕芳圃觀其制藝書法深  
器之曰君將來爲國柱石豈幕下客耶固請之乃薦於同

官某令令狂率初作稟稿一筆鉤抹大愠辭歸芳圃詢知其故贈以膏火勸理舊業先生遨遊西湖聞學使臨松逾月恐以廢考爲芳圃所聞連夜歸松值貢院被災改期入場得與選拔時乾隆丁酉歲也朝考一等以知縣分發雲南適促侵軍需報銷辦理須才大帥聞其幹濟檄調來川補健爲令綜理竣事陞任司馬凡有大事奏稿皆出其手無不當 上意陞川臬任方伯而其初不足爲縣令所取然使主賓相得將以記室終身又安能文章經濟大顯於世乎人生遇合升沉自有定數彼某令第爲鬼神所使而不自知也宰仁壽鼇峰書院示諸生云文翁石室紹千秋

汲古從來綆欲修未必公評無月旦果眞名士定風流疏  
簾清簾超塵俗細帙牙籤仍校讎盛世躋民仁壽域跨鰲  
還許到瀛洲署後石上鐫詩有城郭山林氣自佳句餘皆  
磨滅因足成之城郭山林氣自佳蔥蔥鬱鬱望中皆跨鰲  
半月深藏寺落馬斜陽返照厓芝嶺春融花繡野苦園人  
靜鶴鳴階吟餘只愧貂難續鐫壁空將曉岫排徐芳圃後  
亦官至方伯惟賢知賢固一見有水乳之契而一時司札  
有人不能另爲位置亦富貴逼人貢院之火爲之佇俟久  
矣

綿州李价臣藩自號稻村老人乾隆丙子解元就學博名

其詩集曰戲彩堂爲人偉軀美髯言笑溫如自謂初未學  
詩癸酉選拔後葛肩峯先生教以韻語乃始爲之發解赴  
鹿鳴宴有句云恩拜鹿鳴朝鳳闕才慚驥尾占龍頭父母  
年俱八十於癸未 皇太后萬壽請封紀恩詩云 詔賜

椿萱舒化日觴稱桃李舞春風八十自壽詩云黃梁夢醒  
更逍遙八十年華歷四朝比我精神梅一樹助余情興酒

三蕉長加馬齒隨天意卜定牛眠待鬼招修短前途慵早

計林泉清福且容銷何嘗安樂自尋窩頗覺吾家勝事多

白髮阿兄猶健飯青年快婿早登科

羅金函辛酉舉人

生徒聚會

賡難老兒女團圓釀太和回首椿萱雙

詒賜稱觴先把



聖恩歌爲吾東劉文正公小門生入京謁見時謂見汝  
元文卽知器宇非常福澤遠到文正公號知人价臣終西  
昌教諭固未顯達然觀其詩不求奇而有一種溫厚和平  
之氣二親老壽兄弟並登大耋園林亭館優游自得福澤  
正未易及也有句云宦海休誇登岸早名場終覺負恩多  
蓋感鉅公多以國士目之也

安岳令朱琦山東歷城舉人家世以詩學書法擅名嘗見  
其所書聯字特美秀題寺僧慈量壁云屢叩禪關對夕曛  
道人心迹似閒雲木犀香發畱山谷貝葉書成學右軍粥  
鼓鐘魚塵不到風篁松檜夜多聞明朝又踏塵埃去回首

香臺曙色分國清寺夜月卽事到此何寥寂言尋學地禪  
緒風歸竹靜孤月映松圓虛牖清光滿閒庭夜色鮮惠休  
應未寢試誦碧雲篇

乾隆三十一年任

王大令駒若昂溫江人乾隆甲子舉人壬申明通榜宰新  
淦有惠政請養歸夜泊洞庭湖推窗望月忽見浩波中燈  
火一道自遠而近幡旌前導錦衣多人夾宮車而趨從十  
餘騎去舟兩箭之遙履水如平地呼家人起視已過盡隱  
隱猶見燈火舟人謂龍君出巡云素好爲詩多散逸曾孫  
侃搜篋中得銷夏詩疊韻二十首錄其半焉靜室堪消夏  
閒情兀坐中隔簾花解語繞戶竹生風爽氣終朝在元功

一綫通匡床隨意睡一覺夢全空僻院堪消夏清幽滿目  
中苔深藏宿露樹密舞迴風幾度蟬聲曳頻來燕語通松  
陰纔小立炎暑已成空古寺堪消夏閒行殿宇中曇花飛  
細雨貝葉動疎風字沒碑難辨苔荒路尙通果然清淨地  
色相令人空野店堪消夏扶筇入肆中碧傾桑椹酒香送  
稻花風把釣人相約尋幽路可通咏歸詩未就腹笥笑空  
空田舍堪消夏心清溽暑中課晴還課雨聽水又聽風巷  
僻隣桑茂溪深堰水通徘徊明月下涼露下高空古驛堪  
消夏蒼茫落照中涼生千里月塵淨一鞭風候館蛛絲罥  
郵亭鳥道通眼前無伯樂誰說馬羣空水榭堪消夏茫茫

數頃中漲生新過雨波曳暗來風畫檻時時動朱櫺面面  
通置身何所似如在海天空望月堪消夏清光四澈中映  
花生薄霧篩竹弄微風客向迴廊立人來曲徑通廣寒看  
不遠逸思欲騰空聽雨堪消夏瀟瀟滿院中蒸人無烈日  
撼樹有狂風簷溜懸懸急渠流活活通料他池沼滿不似  
舊時空夜話堪消夏良朋四座中簾閒人對月座上語生  
風說鬼心何喜談元慧欲通無聲天籟靜一鶴唳長空獨  
坐堪消夏怡然自得中到門無俗客入戶有清風世慮頻  
頻遣吟懷渺渺通階前花影動涼透小齋空

陸箕永字二水江南華亭人舉鴻博康熙五十一年出宰

綿竹兵火後土著絕少報墾半楚民獄訟甚繁二水履田  
正界無月不在外憩宿蘭若所至畱題政事文章兼而有  
之三溪山泉云邑西南河曰射水洪流迅激勢千里溯源  
云自三溪山山足蜀王親發矢矢發泉湧如有神驚湍直  
與綿江齒茫茫千載矢猶存鏃長七寸還餘咫我乘公事  
來西郊策馬彳亍眠山椒行行竟達廣安寺寺後兩穴噴  
銀濤峰切峭石駢嵯牙琤琮一道飛瓊瑤咄哉奇景世莫  
比山旣巖嶮波噴驕此事假不親涉覽傳記毋廼齊東嘲  
吁嗟乎人閒井窺蠡測空自勞眼前怪異紛相遭何必尋  
山定越昆侖高泛水端上星河舫綿竹竹枝詞云村墟零

落舊遺民課雨占晴半楚人幾處青林茹作屋相離一壩

卽比隣

川地多楚民綿邑爲最地少村市每一家卽一壩

番夷作活來連村遶舍總成堆明年二月綿江口負米呼

豨打伴回

威茂蠻人至冬月俱磁負而至爲人作活一交二月卽買猪米結伴歸去彼處常寒難禁內地

之熱

齟囉聲裏雜笙簫畫鼓金鐃彩幟飄歲歲朝山誇勝

會可憐忙殺女嬌嬈

川中朝山會名爲進香求福

窄袖寬衣袴褶長綠

雲新樣窈娘裝筵前唱徹迴波曲乞取青蚨作打廂

俗有唱婆

子多二八雙鬟於酒肆席間賣唱在人調戲蓋土妓也

山村社戲賽神幢鐵撥檀槽

柘作槩一派秦聲渾不斷有時低去說吹腔

俗尚亂談

一三五

八四門場馬負肩擔總雜糧買得紙花紅織帶歌呼歸去

趁斜陽

邑中以一三五八爲四門之場期

線磴回盤萬仞岡采茶郎似去

年忙兒家門戶原依舊認取沿山七里香

西北多產茶上盤絕壁下臨湍

流採茶時男女羣往攀援峻險如猿猱然

窄窄田塍淺淺塘大家分缺浸新秧

誰云如繡南東畝不似三吳魚稻鄉

荒地都行開墾一片水田秧針如繡實不

讓江鄉也

花牒從將五恨畱海棠人只數昌州枉他官署東風

裏萬朶吹香傍小樓

譜云海棠無香惟昌州者香今署中三株開時頗爲芬馥

嘉話爭

傳庾嶺梅年年獨向小春開綿陽亦有花千樹何事遲他

驛使來

川中梅花於十月大放雪香十里頗異他處

堰堤修築苦年年灌溉相

資決亦便白棹風催連夜雨綿陽河上水兼天新穀收來

論擔擔正供祇賦什之三愚民只是貪癡甚如此君恩

總末語

王敬公字漢淑一字爾成商河人順治戊戌進士初令屏  
山遺黎無幾招徠甚至苗賊爲亂眾號數萬率數十人擒  
其渠魁餘皆潰散其有幹略如此陽邱道中谷口雲埋一  
徑斜荒巖老樹叫殘鴉山村寂寞行人少落日風吹躑躅  
花秋怨浮萍影斷蓼花汀一曲笛聲中夜聽銀漢初低波  
月冷含情獨自數流螢

陳維謙和友人蓼花原韻四首云上苑名園未許干嬌紅  
虛擬玉驄繁恨餘澤畔閒吟處影落桐江舊釣灘幾點蘆  
花秋欲老一聲漁笛夜生寒雨絲風片曾經慣不作蕭條



遲暮歎金風瑟瑟影搖秋  
慣閱煙波不省愁斜倚晴霞如  
解笑靜含朝露欲低頭亦知野曠  
慚清韻卻抱孤芳俯濁  
流隔岸楓林相映好蒹葭一派冷汀洲  
何處依稀泣杜鵑  
紅英紫艷鎖相連武陵春色歸秋浦  
水國朝霞帶暮煙旅  
雁不驚塵外夢閒鷗好結靜中緣  
一從名附羅含譜贏得  
詩人費錦箋一點幽情寄水湄  
夕陽古岸影離離潮生極  
浦魚吹葉珠絡煙梢鳥弄枝叢桂  
漫勞招隱伴芙蓉好共  
托相思自憐生在秋江上不向東  
皇怨後知

彭縣人

錢塘吳秋漁昇遊幕吾東名勝皆有題咏後以孝廉分發  
來川爲縣令歷官知府告歸生平詩集甚多錄其有關於

蜀者鑑湖石魚篇序云涪州鑑湖有石刻雙魚一銜芝草  
一銜蓮花牧是邦者有循良績則見陳笠帆觀察五世伯  
祖陳良模字範卿吳江人萬厯中舉於鄉知涪州江中石  
魚出者三沈璜近事叢殘備錄之州志所載則時同諱同  
而姓馮氏六合人蓋兵燹之餘文獻無徵載筆偶舛也觀  
察訂正而勒之石因作長句紀其事巴西靈蹟雙石魚鑑  
湖百頃沫且濡錦鱗六六刻畫細碧銜芝草青芙蕖未詳  
年代製誰某不著鉤餌忘鱸枯政平則見否則隱事雖近  
誕理不誣嘉禾生庭木連理山出玉漿池生珠神君神父  
致神物往事厯厯堪編摩太邱治行本家法代有良吏元

龍如鹽不計口民害去鰐肯受網羣邪誅涪江刺史仕明  
季芳聲欲並前賢驅刑中於鄭教美魯休徵捷若鼓應枹  
雙魚游泳出水面觀者如堵歌爲于至今萬口尙傳說當  
年百里同歡呼使君虎節入西蜀宕渠五載司軍儲偶閒  
籌筆緬先烈蒐攷舊事讎方觚里居已訂志乘誤姓氏尙  
喜叢殘書貞珉深刻垂萬禩辯證足使羣疑祛烹鮮媿我  
來澤國臨淵之旨師江都石人石犀渺何許鑑此源水澄  
懷攄豐年入夢豈虛致漁者宵肅由中孚清芬可誦心實  
獲常鱗不詠吳淞鱸蒙山中頂茶序云山凡五頂中頂最  
高土僅寸許漢甘露祖師吳理眞種茶八株今尙存其七

高四五寸其一高尺二三寸夏初發芽數十卽有雲霧覆其上先祭而後采采畢卽似枯枝平時樹柵局鐫以守護之不特非蒙陰石蘚比并不可混以蒙頂之通稱矣名山王大尹嘗以 貢餘分餉然僅一葉其寶貴如是客從蒙

山來詒我仙人茗溶溶一片雲珍重出中頂我聞漢代植

此茶劫數已歷恆河沙顏焱不折凍不萎老落古雪封杈

枒世閒紛紛說蒙頂火前嫌晚收冬牙

蒙茶之隆冬甲  
坼者見茶譜

豈

知陽氣要全受

圖經蒙頂茶受  
陽氣全生最晚

聞雷試採猶枯槎雲蒸霧

擁茁莖葉搏桑鶩樹涵精華山靈呵護官隸守視載稽數

毋舛差分甘竟許識上品波及洵足榮臣家焙藏不事苦

太少烹點有法無由加安得春風吹浩蕩催放千片青

杷

杷杷芽亦蒙頂茶名

不能四兩也滿把盡已宿疾消痕癢

獲蒙頂茶一兩

以本處水煎服除宿疾四兩卽成地仙見茶譜

綠菜序云吾浙紫菜生海中石上

見紺珠蜀中綠菜色味形皆絕似惟色差綠耳黃山谷令

蘆山時作綠菜頌今則嘉雅水石間多有之又益部方物

略紀戎瀘眞珠菜生水車石上翠縷纖蔓首貫珠致數千

里不壞殆亦綠菜之族類歟雅南佳產敵吾鄉綠菜爭如

紫菜良顏色縱儕巢大小生涯亦在水中央風湍激激溪

毛聚乳竇淙淙石髮長孕出雲根眞淡善生無海氣自甘

涼啜殘魚鴨畱磯薜餐盡煙霞掇澗芳采處終朝纔一掬

製來炎夏已盈筐食單作頌應奴筍蔬譜遺名笑撤薑品  
入行廚輕可挈價懸山市賤能償漁衣亂疊雲千葉苔紙  
斜封玉一方冷酌不煩挑野蔴清齋兼可佐羹湯鮮逾葵  
甲初含露嫩似蔥袍未帶霜縷切最宜盤翡翠調和稍下  
酒鵝黃千絲纏齒莖同滑一筋沾唇蕨遜香愁鬢看人容  
易改春波照影等閒嘗料量齏羹添新籍洗滌腥砧付別  
腸不是美芹嘗闡味夢中難著蹴園羊

李天英永川人號約庵乾隆丙子舉人少穎異酷嗜吟咏  
爲貴州開泰令精于吏事疑獄多所平反罷官後益以詩  
自豪短章零句人爭傳誦同時名宿如袁簡齋蔣心餘王

夢樓翁草溪均深推服有居易堂詩鈔梅花云不受冰霜  
挫焉知此格新花非開頃刻天爲養精神一片月橫水十  
分香到人華光久寂寞誰得貌其真與王京兆同年宿敬  
亭云不辨翠微色秋山紅葉重蹇裳隨去馬拄杖倚孤松  
人臥半床月風傳萬嶺鐘曉攀天際閣目斷白雲峰岱嶺  
夜雨云寒星看掌上暮雨忽樽前積氣無巖壑秋聲劃海  
天萬松飛瀑裏三觀亂雲邊恍惚身何在真從象緯眠旅  
燈云望望炊煙嬾微微遠火招破窗風雨暗孤夢旅魂搖  
雁外人千里蛩邊酒一瓢那堪殘醉裏燼落夜迢迢  
武侯祠有銅鼓傳爲征蠻所用形不甚巨而花紋頗細汚

縣武侯祠下掘地得銅琴土花斑駁有聲鏘鏘乃嘉慶丙子修廟時所得也以配石琴與銅鼓更添一段故事矣朱錫穀有詩云范亦侔銅鼓囊真配石琴理絃金氣肅剔蘚土花深至寶有時出元音何處尋千秋同二表長見老臣心

亮蝦出興文城南半里龍王廟前小溪中大如常蝦夜置盆盎中游行腹有光如螢他處所無長鬚逐隊任西東豈有明珠蘊腹中忽訝跳波千萬點水晶宮裏夜燈紅

傅新府義遷成都人幼失怙八歲時佃戶負租百餘石力不能償向櫝中索視籍以筆銷却曰爲語其家嗣後勿再



欠可也長好讀書每以古帖字畫爲樂喜作詩重九云萬  
里遙空雁獨飛逼人金氣肅心脾誰將落木騷人淚併作  
秋風宋玉悲綠酒欲邀黃菊醉青山終與白雲期年來自  
笑疎狂甚倒著山公白接籬看雨歌大風橫吹聲咆哮遙  
空萬象黑雲包遠峰沒匿金烏逃雨勢如霆來蕭蕭蠶絲  
勞攪柳絲飄大珠小珠錯雜跳龍涎雜沓下九霄亂竄屋  
瓦鏗刁騷初疑昆陽軍鼓鬚刀環劒戟突相敲紛然萬弩  
雲中拋頃刻浪湧青天潮小樓登眺憑綺寮銀海光搖神  
已超不能澤物比英豪乘時變理陰陽調奔騰羨煞龍與  
蛟噓氣爲雲勢何驕但聞四壁響周遭苔階浪捲水滔滔

壓闌綠漾戰芭蕉紅衣墮碎芙蓉嬌撫掌狂歌甘澤謠癡  
雲宿霧一時消山光蒼翠濃可描臥聽嘒嘒吟風蜩

山東王洪謀號棗村四川鹽場大使有抱犢樓詩秋夜云  
嚴城鼓角夜三更起坐空堂聽雨聲家在夢中聚仍散愁  
如落葉埽還生人知命薄心空壯老覺才疎氣漸平何日  
歸與茅屋底一尊相對月華明棗村康熙庚子舉人未仕  
而在河南分校秋闈解元實出其門未知其詳籍隸青州  
博山

石砭土司秦良玉以女子立奇功垂名青史朱璋石砭行

云巴東健兒談石砭秦夫人系儒家女

夫人父名葵  
忠州明經

一朝

冠帶領蠻酋娘子軍容壓益部弟兄分將白桿兵

良玉及弟名屏

將白桿兵見明史

豈獨夔巫鍵門戶憶昔援遼破蘭功內家裝束

驚秋鴻綠沈槍舞春星轉花桶裙拖錦帶紅昂藏綽有丈

夫氣帳下粉黛多雄風雕面侍兒工走馬繡巾小妹解彎

弓水赤岷江徧流毒天墮妖星蟲入腹黃虎所過殺氣腥

張獻忠面黃川人謂之黃虎見本傳

枯斲髑髏厭人肉可憐開府不知兵

謂邵

捷春失爭蹊要爭平陸孤軍事急無奈何飭調帝驛空道

促蠻府家法以飭調兵則能飯者

坐見東西蜀剪屠抽營

剩有蛾眉哭孱婦當年受國恩璽書頻下懸軍門龍顏尙

隔平臺見鳳紙親題尺綵溫窈窕丹青人不朽

試看他年麟閣上丹

青先書美人圖  
見思陵賜詩

肯使勳名婦人有一時巾幗畫鬚眉馬下

紅旗馬前酒蜀王不肯樹降幡此身未死殘疆守大節英

風未渺茫青史流傳挂人口成都顛覆近百年軼事猶能

爲家傳紛紛叩竿旄牛族正朔皆稱大順年

張賊僭蜀一  
僞稱大順一

婦嬰城勒保障蠻夷君長韜戈鋌夫人生長青閨裏不願

低眉嫁鄉里請偕刀劒立邊功誓拋白骨沙場死寧南大

帥

左良玉

忝同名忠勇何曾及女子秦夫人遭逢國步何艱

難熨童能歌女能舞編入樂府朱絃彈一彈再唱教嗚咽

海棠花謝春風寒將門新婦誰最賢至今傳有沈紅蘭人

夫

媳沈氏繼

掌石砭印吳嵩梁秦良玉錦袍歌云五花戰馬千金戟馬

上紅粧能殺賊健兒羅拜秦將軍氣蓋西川貌傾國平臺  
召見詩寵行天子臨軒賜顏色宮錦歸來撫戰袍鏤金錯  
繡皆天澤崇禎之季軍政荒本兵獨倚楊嗣昌盡驅流賊  
入巴蜀斬刈黔首如牛羊白桿縱橫三十萬將軍盡室來  
酣戰旌旗五色陣雲高帳下女兒亦驍悍烽火連天笳震  
地殺賊愈多氣逾厲賊中望見將軍來百萬瑯戈同日棄  
雪花如席天漫漫錦袍雖暖邊風酸寄衣一千五百襲將  
軍愛士同飢寒張令軍前鼓聲死本兵不恤將軍恥土兵  
三萬請分廩妾家甘爲朝廷毀巡按巡按嗟何人劉之勃  
與邵捷春按圖扼要十三處奇策不用徒因循此時錦袍

慘無色半碗蠻血參征塵沙場百戰蛾眉老畫像敢望登  
麒麟成都一破金甌裂石砧孤城堅似鐵巾幗蒙恩四十  
年耿耿丹心照邊月左家良玉非英雄一敗終教慙晚節  
思陵身殉福王走南渡衣冠復何有六宮紈綺燒成灰秦  
家錦袍猶世守海內承平二百年岷江劒閣無烽烟妖婦  
何敢結羣盜鼎鑊未免煩烹煎攻心有術當革面內地戡  
亂殊籌邊宣恩一檄定感泣各習井臼投戈鋌請祝將軍  
勵忠義雪旗風送鐃歌旋錦袍樂府蠻女唱弓衣合繡都  
官篇

平定金川後分列五屯經其地者多有題咏是當風土志

洪成龍谷噶云谷噶名何起行蹤自昔無礙驚雲霧散人  
訝雪雷俱伐木緣通徑開冰便轉輸凱旋期在邇日夜急  
飛芻又云深潭藏怪物不識幾千年霹靂山腰震寒雲樹  
杪懸斬蛟須礪劒探子更求筌誓與金酋滅因茲墾石田  
又云雪花兼雹急潭水淨無波永絕魚翁釣偏愁樵子過  
我看疑井底人說是龍窩何日方燒却晴瞻峰似螺又云  
地惡山因險陰陽渾不分始知爲絕域前此竟誰聞雪壘  
朝移帳雲梯夜度軍百蠻應共駭天外立奇勳

曹扶谷獨松渡河云不信金川險從天入地行迅能將日  
逐怒欲與山爭擊機還思濟凌波舊置軍祇今沙石底猶

作鼓鼙聲紫垣綏靖屯雜詠八首玉帶泉云不解金川路  
何來玉帶泉塞雲千疊繞邊月一鉤懸竿馬番兒飲蠻裙  
戍婦滿劫灰今已熄長此洗腥羶小普陀云何必杭南海  
當前卽普陀洞天開似穴鍾乳結成窠法雨垂瓊珞慈雲  
亭擁黛螺眾生瞻仰處千載靖干戈自然井云此井何時  
鑿神工妙自然四圍貞介石百尺湧靈泉曉汲邊雲動秋  
澄塞月圓嘉名誰肇錫記取李屯田溜筍橋云夾岸高擎  
柱中流遠繫繩尋橦如馬駛度索似猱升昔嶺朝飛雪金  
川夜合冰 天威通絕域雲路快攀登獨松溝云汎已名  
雙柏溝還號獨松濤聲江水壯蓋影雪山重枝老難棲鶴



鱗枯不化龍何如雲漢近梁棟慶遭逢

查淳西微云怪名到處共驚奇滴博蓬婆豈異辭校洛柏

溝形據險礪樓蠻障勢難支連營直達新巢穴

索諾木舊勢迫移入

營茹寨因刮耳崖

入夜空聞舊鬼悲天外至今銷殺氣從知無敵

是王師聞官軍拔羅博瓦諸峰云三年西塞枕干戈奮  
怒梯雲冒險多古戍不須守滴博連峰今已過蓬婆但收  
雨雪天心順屢拔寒礪將士和從此吾軍倍踊躍豐碑駐  
看勒巍哉

長白世泰爲法時帆之壻少攻舉業長襲佐領以參戎來  
蜀後升任鎮松潘好吟咏王西驛司馬題其集曰詩龕甥

館稿征途雨霽云憶別蓉城久蠻荒景不同風霜千里外  
雨雪萬山中野草連天綠秋林夾岸紅羣夷知感畏指日  
奏膚功臘八日大悲寺曉望云朔風吹臘日西上大悲樓  
雪擁岷山暗波翻江水流四郊寒氣逼萬戶曙烟浮禪意  
誰能解清心豁遠眸衛輝旅邸和壁間楊文叔韻云寒食  
初經雨未乾蓬蓬春色馬頭看飛來紫氣秦關遠直上青  
天蜀道難半夜月明添客思五更風冷怯衣單從來兒女  
原多累幸接音書旅夢寒

華陽潘東菴元音乾隆庚辰舉人選廣東陽山令卽韓昌  
黎貶所也有詩云吾聞韓退之萬里貶潮陽先茲宰是邑

跋涉餘愴愴彼以一封奏我爲五斗糧名實固已異優絀

胡相望耿耿寸心在僕僕風塵旁總之視赤子所在痛如

傷夜蟲山寂寂漁火夜蒼蒼我欲賦歸去山水笑人忙不

知舟車絕伊人阻一方九十九崕吟云三崕二百九十七

舊云三崕分上中下每崕九十九峯山水最稱險仄一崕一嶺如冠櫛崕中有插

雲峰尖稜孤豎如刀筆銀河水向天邊落東驚西馳謬相

失迴頭不見夕陽根夜半天雞呼日出我本我睂山下人

偶向羅浮訪蓬室連陽一坐四春風釣魚之餘還披帙樂

其樂兮憂其憂五風十雨聯箕畢同冠楞伽時一遊冷然

之洞權舒膝

同冠楞伽俱峽名冷然洞在冠口

却懷汶水浣花濱十二青

城窺太乙誓將買棹上黃牛一帆直到錦官驛

世謂文安簿蘇公爲老泉識者辨其非其地本有老泉公未嘗以自號世或不知其泉或知之而未詳王遲士侃嘗遊於其處作記弓菱溪刺眉州見而愛之將刻石泉側以事去官不果余撮記其略云由玻璃江轉棹青衣江南下里許折而北港口石壁赭立上有望江樓樓後溪深丈餘過石橋有觀竹樹夾立蒼鬱茂密登數十級入觀門由東折而南再入門對門有若洞者額題三大字曰老人泉昔有老翁爲仙以此得名近之厯數石級至底以磚甃爲洞大于一間屋深鑿石壁有泉側出跌落石坎有聲鋪板于

上潺潺流下不知入於何處自昔傳有白蟻今不存由石  
壁厯數級而上殿宇甚古幽暗深邃有十蝙蝠皆尺餘翅  
大若扇質斑白倒懸僅一足掛承塵人云二百年物

梓州城北唐時惠義寺杜少陵流寓於此嘗有詩云前佛  
不可見百身一莓苔卽其地也寺中山洞有泉自石罅流  
出有聲鏗然似琴後改琴泉寺沈澹園太守引流鑿池覆  
亭其上名曰出泉蓋泉伏流引出可以溉田聞中王東野  
應詔偕友遊琴泉詩云樓閣挂絕壁松柏森層巔唐時惠  
義寺瞬息千餘年中有一泓水何人號琴泉泉洞何深深  
泉流何涓涓泉氣侵衣冷泉光鑑髮鮮泉響應岩谷如聞

伯牙絃我欲撫琴和不如泉自然憶昔杜少陵春日遺詩  
篇蓬蒿沒勝蹟來者長流連吾師沈夫子幽意追前賢爲  
築出泉亭更開諸佛天泉水淨佛髻一一頂光圓雲霞燦  
爛處大筆磨崖鐫山靈定歡喜名附詩人傳我輩足所歷  
萬象都增妍卽今酌精舍春色猶堪憐翠嵐落我掌綠樹  
穿我肩鳥歌我座側花墮我樽前相隨二三子逸興同翩  
翩踈鐘撞落日遊客不思還回望琴泉水洞中飛暮烟  
河南趙遵律嘉慶間以進士爲資州牧以政事文學稱好  
古耽吟著述如林初至閱城云枕峯連嶺面江濤翠壁丹  
岩結構半帶礪真成盤石固垣墉平壓月山高地仍舊址

陣隍壯人愜新圖築鑿勞半壁東南資保障烟塵從此靖  
氛囂蜿蜒蜿蜒龍赴淵鬱鬱葱葱蜃吐烟千堞雉飛隨上  
下四圍玉立澈中邊抱誠精衛能填海鍊石媧皇欲補天  
霧集雲來揮雨汗與人漫頌使君賢秦灰漢劫百千過廢  
壠殘基喚奈何不信城成緣眾志須知地利賴人和麗譙  
五夜傳刁斗埤垵三秋掛薜蘿萬古岩疆今樂土攔街齊  
唱石城歌規山疊石費經營鬼斧神工削不成彈指華嚴  
樓閣現舉頭并絡宿參橫九關鐵甕開三面一萼金甌冠  
五城在德乘時兼在險勒名可否問臺卿重九登重龍山  
也向龍山約舊遊嗤余好事作遨頭人如醇酒心先醉寺

少黃花徑亦幽豪飲不須防落帽曠懷偏欲獨登樓試茶  
更汲天池水得得尋芳問貫休連峯詰屈傍城隈萬丈丹  
梯接上臺滿院竹聲岩下出半空人語閣中來池開寒鏡  
畱雲影月掛涼鉤入酒杯便擬乘風凌紫闕不須尋海托  
蓬萊懷古登高復探奇三山山頂舊三池風清日麗蒼龍  
映雷動雲連碧海垂東閣寂寥餘廢寺北阜剝落剩殘碑  
由來天與無雙地滿目蕭條不勝悲彌望靈龕萬佛岩大  
書深刻君子泉眾真共坐壺中月彼岸同登水裏天何日  
梵音歸藏海只今琴韻罷冰絃孤城徙倚蒼苔冷腸斷秋

風日暮烟



叅將某在夔州率士卒入諸葛八陣圖見石數十堆多殘缺不整意謂無奇乃教演軍士鎗砲初發風沙陡起天地昏暗迷不得出乃跪地祈禱天復晴霽

歐菩薩蓬溪雙河口萬厯時人生而好靜及笄適李楚成姻後回母家住宅傍一洞修行人爭頂禮呼爲歐菩薩縣令林公以事近魑魅逮至禁之絕其飲食月餘黃太史輝遣書云僊佛何嘗不世間只因修煉在深山叮嚀爲語神明宰好放真人早出關遂釋回有彭縣邊巡撫供養之間云汝旣與李楚爲夫婦亦曾盡夫婦之道否歐答云旣爲夫婦焉有不盡夫婦之道邊又云色慾大道所忌何故又

染俗緣答云前世姻緣未滿邊又扣云汝旣修行知西來  
大意若何答曰清靜坐草蒲團牛歸欄馬歸欄大人問我  
西來意水在長江月在天

查淳爲宜賓令以薦入都畱別士民馬踏芳菲去不還軍  
興五載事征蠻山高水曲尋常意月白風清夢寐間漫憶  
東樓千日飲忽驚青鏡二毛斑流盃池上吟情遠偷得勞  
人片刻間惆悵無華豈足論漫勞入奏竊殊恩戎州自  
笑翻成客錦里攜家未有邨幾處壺漿慙父老好將經卷  
課兒孫涪翁一去風流杳文采還宜熨道存春風隨處聽  
鳴鶯近喜農家不廢耕守土未曾經人駐宦遊對此那勝

情千條綠柳同今昔一樣青山判送迎別有邊愁繫寸抱  
趨庭猶擬請長纓西徼悲笳永不聞軍儲案牘轉紛紛翠  
屏杳靄空春色白嶺迢遙帳夕曛待出秦關瞻北闕回  
看瀕塞向南雲莫因去住嗟萍水畱照金沙月幾分

熊孝子至性過人兩割股肉以療親疾大竹李羹堂作梅  
見之肅然起敬爲作熊孝子詩以傳吁嗟乎熊孝子割將  
臂肉爲甘旨路人聞之悲孝子行之喜但願老親生遑惜  
兒身死一割再割不知楚老親豁然病良已一解兒肉甘兒  
心苦參苓不及兒之股肝腦塗地亦無辭一片精誠出肺  
腑二此念充之卽大孝足振綱常勵名教區區豈是爲浮

名想見平居承色笑

三解

古來節烈人始念堅於鐵決胆捐

軀報君父萬古不寒忠孝血拘儒往往斥其愚喪盡天良

爲此說

四解

丈夫平生多繫戀一旦臨危心已變幾人盡瘁

憂家國太息人心不如面談忠說孝亦何爲空詡讀書能

萬卷吁嗟熊孝子可入鄉賢傳

五解

見此孺慕生願爲牛馬

走我向熊君頻稽首甘奉醇醪一玉斗更把黃金爲君壽

與君爲友君許否告爾世間人伊誰無父母

六解

惜未著孝

子何名應是李同邑人

蜀汀險矣猶非至險王漁洋沿路有記陶雲汀諸灘記之  
甚悉世傳最險之處莫過於羣猪陡崖卽吳白華詩所咏

羣猪灘也又有刻石四語云羣猪陡崖高掛靈牌有事速去無事莫來字亦奇偉行者觀此爲之心悸崖在涪州三峽惟觀音峽有漩窩可懼餘則順流直下耳最險者大江之外自敘州由金沙江逆流至屏山僅三日程兩壁峭立視巫峽更狹更陡天僅一線入其中陰森可畏江中多石舟須宛轉避之又有大漩未至買席數十預爲拋擲得席水平舟趁勢疾過否則倒插入水又多灘未至一二里聲已聒耳近則飛花噴雪濁浪轟雷夜宿維舟往往如霹靂驟響水之吞吐起落人莫能測販重物者自此賃舟必先書約死生惟命兩無相累其險可知由渠縣經廣安泛舟

渠河有九九灘八十一瀾舟行此中八十一折水狹石劣  
舟觸卽碎惟一家父子善操舟折旋如意毫釐不失舟至  
必僱之有定價世代相授不傳外人要不過操之孰耳然  
老於江湖者至此不敢措手故曰大江險矣猶非至險  
秦始皇爲寡婦清築懷清臺寡婦清能以財自衛至動秦  
皇帝之聽其富可知其子娶卓王孫女卽文君也得毋深  
愧其姑卓王孫與富室結姻宜不喜家徒四壁之相如及  
貴乃獻牛酒則當日之薄其女非徒以失節可知  
秦良玉拒賊武略過人草檄如飛兼優文墨所用硯子孫  
寶藏後以贈人可惜明懷宗所賜紅袍鮮艷如新兩金龍

直立較今人衣長一尺其軀幹雄偉可想

屯中山內產雞曰馬雞眼赤毛灰色多白點似竹雞重八九斤煮之不熟火燂雞類馬雞重亦如之背上有紅毛圓如碗食之最美尤莫美于雪雞過二年則肥甚形絕類雞周身雪白尾甚長有斑古所貢白雉疑卽此物但所食惟冰雪又有似雉而絕小者尾長于雉伶人所插雉尾卽此吐綬雞晴日吐綬五采繽紛養于家則不吐性不適也飛虎形不甚大似虎有肉翅翅上紅毛長尺餘翅底短白毛

屯中產馬鹿視馬更大野牛甚巨首惟一角截之可作水

桶羌活魚羌活根下有水湛然中有魚游泳理不可解亦最難得

彰明產附子江油與連界過界咫尺種之則變不爲附子矣

屯中達磨花木本葉如構花形類包穀上尖下粗全似絮無瓣無鬚雪中開花與雪蓮等婦科要藥雪蓮狀似蓮小如酒盞

藏中紅花最難得販于外皆種成者真者生于山野花長寸餘拔一條置水碗有紅絲旋繞滿碗婦人飲之最能生血價較人參猶昂惟有勢力士司得買



明社已屋嘉定伯楊展勇力善射屯田聚眾扼張獻忠於江焚其舟燹其卒沉金銀數百萬於水大快人心其遺像猶存程尙濂題云珣弓鐵鍛鞍剽悍如犢弩蛇矛左右盤陳雲不知苦讀詩想見其人

費此度密明之遺民流離塞外嘗有句云大江流漢水孤艇接殘春深爲漁洋所賞有遺像蔣心餘題長古其上總括生平可作志傳讀上書無益起義兵壯士自結飛來營安定關中十萬戶賊不敢犯人長生司命三軍贊孝子剪髮辭官父歸里攜兒避亂陷凹蠻黃金竟贖全家死楊展鎮蜀真英雄孝子入幕參元戎青神江底沈賊鏹誰賊之

鍾張獻忠得賊資糧卽拒賊雅州屯田孝子力募僚纔辟  
杜樊川叛將陰戕張益德六郎奮起報讐軍孝子獨救花  
溪民展轉兵戈逐亡命故鄉焚掠無荆榛折節治經三十  
八換盡滄桑逃劫殺支節五嶽不談兵倚馬千言看給札  
著書等身百廿卷 詔舉鴻儒力辭免幾度題詩壓謝陶

平生賣藥師盧扁心喜揚州好墓田老來栖息大江邊姓  
名已入遺民錄著作分藏石室編深衣幅巾寫遺像獨立  
蒼茫空倚傍那須靜坐習枯禪可惜儒冠老名將昇平埋  
骨野田邨七十老翁流寓身誰爲亂世文中子翁是成都  
跛道人

四川女官推秦良玉凡土司無嗣或子少者輒以女襲焉  
東田山薑先生撫黔黔多土司有東川土司詩甚奇四川  
無東川土司之名疑蜀土司女不遠我觀女官如觀畫閭  
立本繪職貢圖我觀女官如異夢奇形詭狀非一徒我觀  
女官入破寺陰風慘淡魍魎呼古鬼昏燈揭鉢立老佛變  
相獅龍趨妖狸鬪體抹粉黛修羅甲冑吹笙竽雌者青氍  
毹蓬首雄者碧眼拳髭鬚女官氣槩偉丈夫火浣大布纏  
其軀九真藤杖紅珊瑚金環兩耳垂嶺珠腰下斜挂雙湛  
盧繡裙拖地蓮花襦自言年紀八十餘少小生長東川隅  
通侯爵印大如斗但有刀劒無詩書錄此以廣異聞

四川東有巫峽夔門之險西界雪山岷嶺北扼劍閣南鄰  
蒙部烏撒大江貫其中潼河金沙繞其外古所謂四塞之  
國某將軍繪全蜀圖蔣心餘題之云放眼窺全蜀巖疆一  
望收江山奇險處猿鳥過來愁傳檄方平虜將軍足快游  
壯哉橫槊者咳唾劍門秋銘功崖外闢圖像閣曾開別有  
丹青筆遙知戰伐才春臨諸部合山東大江來想見籌邊  
日從容數舉杯空江畱八陣全勢出三巴峽壁縣飛棧礪  
樓隱莫笳諸蠻晴練鑠列郡翠屏遮笑指羌渾若奔雷走  
傳車錦里看桑梓鄉山次第圖至難稱蜀道信美是成都  
讀書昇平見傳家典籍俱丸泥封隘口從此罷前驅

楊升菴先生生時母夢神送五代忠臣夏魯奇至曰武臣  
也以中庸十八章輔之升菴文章冠世而忠節堂堂蓋夙  
根也按五代史魯奇乃吾東青州人爲唐莊宗大將最驍  
勇莊宗被圍魯奇持鎗挾劍手殺百人衛莊宗以出單騎  
追王彥章槍擬其項生擒之鎮許州將去萬眾遮道臥轍  
得民心如此後守遂州董璋畔與孟知祥來攻援絕食盡  
魯奇自刎蓋盡節于蜀卽轉生于蜀其英靈固不泯云  
吾東寧海楊君岳東進士道光三年權榮篆農民告某侵  
耕宋王岸古墓往視荒草一邱掘土得殘碑已鑿而圓之  
僅餘廉遜處士數字乃砌于墓前而方其外作詩紀之按

庠秉母教與弟序讀書成名東坡屢以書相往還詩云昔  
讀坡公集海外文更奇策論氣習盡天放才不羈中有箋  
幾幅妙論千古師讀書數次過應敵八面宜此語爲誰發  
萬里寄親知因慕王庠名言訪王庠碑苔蘚有石穴荆棘  
無野祠如何買山者耕田侵墓基其後齧溪澗其下浸塘  
池田父或愴感薦紳難言之殘碣沈稻水掘得水中坻毀  
方圓如磨沙泥極洗治獨有廉遜字秀勁盤蛟螭藉此一  
片石考信無復疑遂使柳下壘樵採戒氓蚩豈非潛呵護  
精靈儼在茲生前有知己范呂多薦辭庭堅及舜民素心  
相與期誓日先忌酒憂國言行危大節森青史徵舉談笑

麾官階遜其弟田里義不辭惜哉世論刻而云晚節衰弟  
貴起宅第兄避舍茅茨是爲於陵子矯節奚若斯鬱鬱松  
樹坡華表禾田歆俗呼王庠塘咫尺冢相離昆季殊榮隱  
歿後名共馳生死相依賴千秋豈一時貴盛易零落才士  
聲獨施世無蘇長公湮沒良足悲論交元祐黨問奇懷天  
涯風氣真不朽雲壑發長思

蔡呂橋曾源崇寧人乾隆庚子進士官山西翼城縣知縣  
工詩惜未多見和錢南亭明經蘆花原韻最見才思雲垂  
澤國思依依花正開時葉漸飛着地無心鷗欲夢沿隄有  
影雁初歸晴天漠漠畱殘月秋水茫茫淡夕暉化作兜羅

綿更好肯教塵滓污仙衣歲月堂堂疾似蓬無端浪跡任  
西東遙青抹去初疑霧淺白吹來乍有風輕點暮山林薄  
外遠浮斜照水村中故人分袂吟秋色煙冷叢深一畝宮  
卜居無竹亦何妨花滿園亭興欲狂揮塵自能團作玉壓  
稍翻覺重於霜牛痕冰落明秋氣一片雲寒接大荒不夜  
乾坤人睡起雪天吟望泊潯陽合伴詩人骨相孱蕭蕭冷  
豔照酖顏最宜點綴楓林晚不似輕狂柳絮斑天地有情  
飄泊外江湖幻跡渺茫間鳴榔莫怨霜華重木落山空任  
往還尋常花片撲塵襟雨過江鄉愜素心光黯淡疑鋪遠  
陌韻飄蕭欲滿層陰波迴淨練秋搖櫓葉捲清笳夜搗砧



一望海天如此闊。知他藻荇自浮沈。沈寥無際碧虛寬。霽  
色波光耐久寒。涼已化雲秋淡淡。暖疑烘水夜漫漫。有人  
遙浦悲霜鬢。何處孤舟倚釣竿。粘地無根容易長。莫愁江  
上夕陽殘。雲是心情雪是痕。隨波漂蕩渺無垠。遠川晴漾  
白沙渚。高閣水明黃葉村。不向蓼汀誇麗彩。偏從梅塢逗  
冰魂。千紅萬紫春風過。如此秋光與誰論。西風瑟瑟玉壺  
澌。兩岸飛花積幾層。吹去飄搖偏似雪。供來清冷祇宜僧。  
又驚天上青霜落。那管人間白髮增。三十六灣秋正好。凌  
虛仙子欲飛升。

何竹有椿齡金堂人嘉慶辛酉拔貢後官瀘州廣文爲人

醇謹雅有名士風錢入手輒盡風雨竟日東楊立之不作  
悲秋態其如風雨何殘書欹枕盡落葉打窗多白日比長  
夜青年惜放歌小樓高縱目頗望故人過風雨和立之二  
首忽聞新舊雨未聽短長更薄飲不成醉高談轉覺清夜  
涼蘇鶴夢秋淡入鷗盟他日巴山去應還憶錦城舉酒無  
今古浮雲有變更魚龍沈夜冷琴鶴感人清天漏可能補  
歲寒誰結盟殘書空坐擁只惜是愁城送張魯生之隴右  
匹馬曉蒼蒼關河路正長雞聲邊月白風色隴雲黃豈不  
懷弧矢何須嘆稻粱臨歧莫回首別意在垂楊發成都道  
中卽事有懷錦城諸友兼柬王西驪司馬一過沈犀浦江

流自向東天涯遍芳草何處問春風細雨香塵暗浮雲客  
况同解裘堪共醉美酒憶鄆筒九日同友人遊青羊宮貼  
天雲氣薄成霞清淺寒溪枕白沙隨意自沽村店酒無名  
閒數路旁花狂談不厭風生舌結習難除癖嗜痂高會可  
能成盛事成都依舊遠紛華楊立之招同蔡小山尉琴南  
李石筠宴集齋中時余將作客青城而小山諸人亦將他  
去爲之悵然今年冷落過花朝小別城南萬里橋難得清  
明好風日又聯舊雨共招邀雲真易散人同病春已無聊  
柳太嬌我酌未多心蚤醉狂奴態已與魂銷打包我又向  
青城別路非遙恨亦生只許春風住三日可憐芳草最多

情酒徒畱戀杯中物山色浮沈世上名不及年時秋雨夜  
虛堂同聽短長更有感不分風月與山川但得清閒便悟  
禪躍冶劒纔能繞指知音琴卻在無絃魚龍夜氣森秋色  
裘馬豪情累少年誰詡文章都有福茫茫浩劫幾人傳

袁竹園師洛邾縣人嘉慶辛酉拔貢教授生徒足跡不履  
城市現官永寧儒學年七十有八爲李氏族人代作賀李  
立齋昆弟建雙孝子坊詩立齋名耀崇邑茂才與其兄全  
穀廬墓六載辛丑春同日建坊其父名綏伯崇邑庠生向  
曾廬墓載入邾縣誌立齋昆弟之純孝實其尊人有以啓  
之天生純孝萃吾門父子相承厚本根况乃棣華多競爽

那無烏鳥報深恩墓廬兩世哀思擊泣血三年苦志敦存  
順沒寧風派遠家聲從此噪鄉村

徐青萬應選辛卯副貢剛直好義里中子弟貧不能學者  
助以脩脯薪米有爭鬥詆諆者聞言莫不折服晚年著有  
友風文稿壽八十而終曾示夢於家人爲重慶府城隍生  
平不多作詩暮春過許水南故宅云梅海天荒起暮塵更  
從何地著斯人曾將泉石開生趣別與雲山有夙因野鶴  
尙尋三徑月鄰鶯如訴一園春風前獨立吟招隱楊柳迷  
離悵水濱

牛炳堂宗文邨邑茂才爲人豪爽有才氣性嗜酒每當酒

酹耳熱輒慷慨高歌年五十餘卒題薛濤井滿庭春草今  
年碧一縷芳魂墮劫灰文想鳳毛花想貌門臨驛路水臨  
臺新詩欲倩鸞箋寄好夢曾無蝴蝶媒唐代風流今已矣  
寒梅猶向浣溪開綠楊深鎖誰家院爲覓芳縱到此遊鷗  
鷁舌傳香閣語枇杷風送木蘭舟一溪碧漲花全放古井  
波寒色不秋勝地依然江水艷芳魂夜夜繞詩樓

蜀地國初雖入版圖而變故屢經順治十六年重經恢復  
城中草木蔽塞麋鹿豺虎縱橫民舍官署不可復識各官  
樓於城樓兵則射獵城內蜀王府野獸聚集二三年捕獲  
未盡兵士初集往往于廢宅掘藏金盈千累百或數十金

亦二三年不絕今休養生息塵市櫛比沐聖恩之隆厚  
烏知前之蕭條慘目耶

馬右文以筆墨遊幕來川與武營相識在營議敘軍功爲  
武弁與滿營豐公紳博戲口角懷嫌及豐官提督馬隸麾  
下懼以宿嫌獲戾語其相識商曰吾二人不相能今爲屬  
員若當眾棍責何以見人吾將告退矣其人止之曰豐公  
有識能用人君與彼私憾耳若以君才必不遽棄吾試探  
之果不可解告亦未遲一日設筵邀豐飲酒酣微及其懼  
罪欲退意豐沉思曰可召之來其人不解何意馳使招至  
俯地謝豐扶起大笑曰彼時吾輩徵逐君不料吾爲提督

吾亦不知君至何官若預知豈有相爭事耶君何謝爲速  
坐飲酒且命入署襄理軍政豐公旋爲將軍卒薦馬擢顯  
職如豐公者豈不廓然大丈夫哉

涪州巡檢鄧昂性豁達昔年此缺沃饒歲入七千金戚族  
聞風而至署中不能容棲之旅舍寓於寺觀其子乘閒言  
食客太繁費不給後日何以自顧昂慨然曰吾捐官僅用  
七八百金今歲入小缺縣不能及吾何德以堪毋亦天憐  
許多窮人無以爲生使吾養之吾且託彼之福長此久處  
共享飽暖倘若輩盡去吾官不能从做子毋復言在任二  
十年無別差委及升四望關資遣眾人次第去而鄧君已



病謂其子曰吾言何如今箱中有千餘金治後事畢資給某妾餘千金爲汝田產無他囑君讀書不多而見地超卓如此真豪傑也事堂上官無不得其歡心見幕友學徒冬衣單寒者暗度長短製裘送之託爲貨衣者價廉不卽索值異日償之則笑曰吾特送公恐不受故託言之無須問也

玉壘浮雲相傳已熟而未悉玉壘確在何處葛荃作川江水利考茂州雪山名九頂山蒨江所出卽玉壘山也按金仁山通鑑前編謂雪山冬夏如爛銀蓋盛雪積聚白光晃漾因以得名葛荃云保縣玉壘山石刻玉壘二字灌縣西

北玉壘山巖鑄玉壘龍津四字則湍水所經因冒其名非  
眞玉壘也

成都許世亨爲廣西提督乾隆五十三年征安南屢次與  
賊大戰奮勇出力擒阮匪 賞子爵五十四年阮惠降後  
糾眾搶奪黎城世亨隨總督孫公士毅前至富良江孫欲捐  
軀殉國世亨阻止謂總督大員設有疎虞國體攸關遂派  
副將慶成護送薛忠挽孫公馬韉退出已乃領兵弁大呼  
直前手刃數人歿于陣以惜死勸大將似姑息之愛然重  
臣爲敵所戕卽異日輸誠納款亦不蔽辜難于結局許非  
徒勇明于大義後慶成 召見面奏委曲 純皇帝深嘉

子贈壯烈伯子孫世襲長子襲爵兩世無後次子之嗣保瑞現任陝西西鄉縣知縣今年請兼襲伯爵

茂州相傳楊妃所生地縣南有娘子嶺甚高峻離縣六十里有龍池出慈母山下周迴四十里南百三十里有龍洞石壁高懸洞在下溪水流入莫測其洩處此與棧道之龍洞名同而地異亦葛荃記

海侯蘭察數平巨寇爲本朝勇將子某襲侯領索倫兵來川協剿教匪將由山徑逐寇眾以路險恐遇伏侯斥其怯懦奮勇直前伏寇四起索倫兵平原馳突莫當山險無所用武盡爲賊殲有渠魁多力善射所用箭鏃寬四寸餘

一矢射中侯面削去其半後其賊爲廣安州人射死

王公贊武號建東貴州興義府貞豐州人乾隆甲午孝廉爲南部宰嘉慶五年二月賊首冉添元等竄入南部境內公率鄉勇五百人馳赴富村驛剿堵賊見驚奔公追逐十餘里不及暫回富村傳餐賊突至鄉勇驚散公挺身殺賊數人賊眾力不能禦遂被害李元方苞帛之云嘉慶庚申春么麼到此地白芳五百人王宰權作帥奮勇來截剿賊黨已辟易矛浙劍方炊兵曳甲忽棄驚鳥散紛紛鵬鷄更猛鷺挺身獨巷戰殲賊猶三四旌竿何太多一劍非不利山欲亡彭岑民真失龔遂伊余牧劍陽南部當巽位小醜

前跳梁謀者曰翹企我裁雁足書君答蠅頭字爲言剿且  
防大局已布置不使境以內白晝走魑魅更擬擒渠魁檻  
赴持節使當時壯其言謂公真能事忽聞身被難南望揮  
涕淚守城人藉口殺賊誰奮臂卓卓毛海客與公同此志  
蘭州牧毛公大瀛聞賊臨  
境亦率鄉勇堵禦被害梗概書貞珉遺像存古寺碧雞  
金馬神永鑒此靈異

石琢堂蘊玉吳縣人乾隆庚戌及第第一未散館充福建  
正主考旋督湖南學政異數也嘉慶戊午出守四川重慶  
教匪方熾立團練法習技勇分三班更番休息賊渡嘉陵  
江不敢犯渝城勒宮保有探事卒十七人過梁達寨民疑

爲賊殺之勒公大怒獲十四人將誅之公謂民誤殺請戮  
主謀者二人餘得免勒公調公入軍營專司章奏多用其  
策賊平有被難婦女四千無所歸眾議分給兵丁公力持  
不可徧訪原籍有親屬者令來省相認咸泣拜去人但知  
公之文學不知其經濟與存心之厚如此也歸里結問梅  
詩社二十餘年乃卒

自榮縣由僻路進省至仁壽經鄧子場有坊大書烈丐之  
坊初某家有童養媳爲姑所逐乞食於外夜遇強暴欲污  
之不從且詈扼其喉罵不出聲嚼舌噴血死之報驗緝兇  
不獲忽有人自呼于市曰殺某女者我也送入衙如夢醒

復不承嚴訊吐實問前何以自投曰女執鞭箠我令如此  
言服誅請旌於朝眾爲建坊題聯云看樹係女貞長懷芳  
躅聽禽鳴姑惡疑是冤魂又一聯云不爲強暴所污視死  
如歸志堅金石未受詩書之訓立身有道寵賁絲綸題者  
爲陳紹襄

女史王淑昭劍州解元王用中之妹閬州蘇兆熊兆麟之  
母也幼耽吟咏著繡餘詩草夏夜云螢火分流花漏清欄  
干倚徧月初明綠蕉窗下涼風起遙送鄰家玉笛聲秋夜  
云金井梧飛露氣秋挑鐙永夜不勝愁霜鴻遠去砧聲起  
無限淒涼怯倚樓

資州鄭廷楷字憲吾號雙橋生平孝友篤實君子也教匪  
之亂閭里驚竄家眾俱奔入城雙橋守宗祠不離惟日入  
城省母歸仍讀書自若及門多掇科以去雙橋以貢生終  
祀鄉賢所作詩文甚富歿後門人工部主事郭君維鍵爲  
刻四卷詩似擊壤集一派直摭己意不求工於字句遺懷  
兼訓子詩真率可味往歲逢薦饑收藏少菽粟倉廩久空  
虛買米充枵腹價踊貴如珠食多人滿屋眾口悉嗷嗷我  
心恆蹙蹙歲或有豐凶人豈盡饒沃貧乃士之常仲賢亦  
啜菽我本山澤癯年已旬逾六天地一頑人課兒在家塾  
閱世多浮沉無心任榮辱日攜一卷書兀坐窗下讀倚



眼不花且喜身無束或逢晝晴煦籬邊看松竹或值夜雨  
零鐙前酌醺醪有廚鳥任窺不杖鳩何祝家人憐我老中  
饋謀所欲我笑對家人老年惟嗜粥但願兒孫賢更祈年  
歲熟讀者奮詩書耕者勤畚耨裋褐可衝寒衣莫貪羅縠  
藜藿可充飢食莫厭苜蓿督工鋤白水呼童飯黃犢餘瀝  
犬分甘多桑蠶滿簇細澆園內蔬勤養笠中畜莫積私房  
財早納官倉穀持世與持家從宜竝從俗斗酒可娛賓杯  
羹亦睦族秉性忍爲高視躬卑自牧聊爲舉一隅當以三  
隅復今歲風雨調新秧連畦綠旱魃不爲災倉箱已可卜  
吾將歌元豐擊壤追芳躅春日卽景云斜陽倒影映重樓

散步疎籬縱遠眸自是今年春雨足豆畦麥隴綠陰稠差  
池燕燕去來忙度柳穿花繞畫堂似是當年曾識我呢喃  
對語上雕梁方塘積水綠盈盈結隊游魚數不清應是豐  
年先有兆安排擊壤賀昇平一望青山碧色籠杏花開遍  
綠叢中東皇有意催耕早故染胭脂萬樹紅

里居時見及門案頭一書忘其名似乾隆年間宦于蜀者  
所著紀么鳳一段累千百言不多載詩僅存健爲李義峯  
七律四首微嫌敘事筆墨冗沓意境亦近平淺要亦好事  
者也自作閨情詩有柳妬輕盈杏妬憨句頗佳餘亦盡忘  
矣

向野修廷賢成都舉人以學博保舉授湖南巴陵令二月  
告歸著倫風一書皆集古今忠孝節義事閒題以詩內載  
江南歌兒婦事帥悅婦色殺其夫納婦置別室踰年就之  
婦俟帥登榻牽衣抽刃以刺帥掙脫婦呼天自殺有詩云  
一年忍死待讐過白刃無靈可奈何斷首秦廷終是憾至  
今人惜女荆軻向君亦紀吾東昌邑李惟中事但敘述太  
略不能動人後綴數語頗有詩意因撮成絕句云廬墓焚  
焚豈好名傷心抔土死如生寒天雪地無人過入耳遙聞  
號泣聲

金馬江分二渠爲楊柳江清水江皆經雙流縣藉以灌溉

其岸高水遠不能沾潤者尙多僧大朗募貲糾工度地勢以導川自溫達新津百餘里溉田數萬頃後人德之名其津曰大朗堰順治庚子事也僧能詩達意而止不求工與新津袁令云治國安民事空空執兩端不作違心舉何求冤債錢眼前皆赤子頭上是青天又題興化寺云興化一片清涼地安居不上釣魚臺坐觀偶得風雷至隊隊金鱗踴躍來出世人存心濟物如此恐現宰官身者有愧色忠州折桅子巖灘極險腳如敗甕舟行避之及漩入不得脫而桅折歲壞船無數乾隆年閒州牧甘澐濱沉鐵鐘十二以鎮水怪復操舟往復上下數日始得放舟之法遂於

灘上立石大書深刻對我來三字行者賴之俗云武侯所立非也

偶見條幅漢州張懷泗仿諸城石菴先生書清曉朝迴祕閣中坐看高樹露華濃綠窗朱戶圖書滿人在蓬萊第一峯後有跋云石菴相國嘗書此詩謂仿涇陽張尙書筆意屢摹終覺邯鄲失步也論者謂公書品在張上而公自記如此自來詣愈高則心愈下彼自滿者皆未深入其奧耳懷泗嗜禪善書多刻石

成都顧芝庭司馬有二女長墨卿名鏐次玉蕢名琳皆能詩其咏秋海棠墨卿云薄薄胭脂淡淡妝西風簾外繫柔

腸蛩鳴落月秋無影蝶戀深枝露亦香翠袖低垂醒舊夢  
紅姿斜掩怯新涼一欄清景憑誰寫半幅雲羅雁數行玉  
蕢云秋風卷袖露凝妝寫入新詩有別腸格似神仙能耐  
冷花如名友不問香月明小院脂痕淡霧濕空階燭影涼  
夜氣生寒勤愛惜錦棚低護一行行

白蓮教之亂齊二寡婦橫行川楚川中亦有賊婦郝氏張  
正隆妻年僅二十許長身玉色鬋髮如雲英勇善戰馬上  
攜雙標百步殺人官軍畏之後被獲見大帥背面坐矯抗  
如故繫達州獄一年臨刑慷慨兵士或爲泣下屍陳市曹  
或竊其首以去大竹李作梅爲賦白蓮曲云白蓮花亂開

花開成妖孽一對野鴛鴦相隨未嘗別不圖紅顏婦乃作  
赤眉賊坐下五花馬手擲千金戟百步取人頭材技殊超  
越一笑挽雕弓能落雙飛翼勇敢東海婦偉幹崔寧妾淮  
南梨花鎗萬人不可敵失機作俘囚玉臂相反接擁見大  
將軍據地無挫折星眸怒不語一顧那能得軍中苦詰問  
叱咤聲逾烈固圍幽年餘不改舊顏色聞說羽書來官軍  
大斬獲妾有伉儷夫勝敗無消息紅淚灑圓扉肝腸幾欲  
裂雌虎憶擒時蛾眉常憤激恥作帳下鬼嬌啼仰人惜不  
得戰沙場玉骨餐鋒鏑粉頸延受戮花光射寒雪慷慨赴  
市曹三軍多掩泣竭來蚩蚩氓竊首葬荒僻何愛美人頭

不恤壯士血黃金買馬骨豪俠真奇絕賊黨聞婦誅膽落  
心悲切惟有唐賽兒一去無蹤跡妖氛漸消沉天兵隨殄  
滅可憐白蓮花花開纔頃刻不及女貞樹青青得長活所  
以古女誠無才卽爲德談往作悲歌頑豔齊嗚咽手把鐵  
如意擊盡唾壺缺

小說多傳訛續齊諧紀一百四十歲老人爲峨眉山樵年  
九十九方得金娶妻生子爲廩生卽周煌之祖李雨村亦  
詳載於淡墨錄按重慶府志周氏世居涪州  
生子儼康熙庚午舉人儼子玳康熙辛卯舉  
尙書世代科第安有老於樵者勿輕信以誣